

याकूबक लिखल चिठी



याकूबक लिखल चिठी

(दङ्गौरा थारु)

२०६५

The Letter

written by James

2009
(1000 copies)

Illustrations by the following publishers have been used with
permission (pages listed in parentheses):

Horace Knowles, © The British & Foreign Bible Society, 1954,
1967, 1972. Additions and amendments by Louise Bass © The
British & Foreign Bible Society, 1994 (cover, p. 17); David C.
Cook Publishing Co., 1978 (p. 13)

Dangaura Tharu Language and Literature Project
and
Dangaura Tharu Translation Committee

परिचय

चिठी लिखुइयक बारेम

यी चिठी लिखुइया याकूब रलह (१:१)। उहाँ येशू ख्रीष्टक भैया रलह (मत्ती १३:५५; गलाती १:१९)। याकूब येशूसे सँगसँग बहर्लसे फे, शुरुम उहाँ येशूक विश्वास नैकर्ल (यूहन्ना ७:२-५), तर येशू मुवलमसे फेदोस्र जील त पाछ, उहाँ येशूक विश्वास कर्ल ओ असिक उहाँ यरूशलेम* मण्डलीका एकठो मुख्य अगुवा हुइल (प्रेरित १५; गलाती २:९)। मण्डलीम उहाँक धेर आदर ओ सम्मान रलहन। बाइबलम और याकूबहुँक फे उल्लेख कैगैल्वाटा। थप जानकारीक लाग “याकूब” शब्दक अर्थ हेरी। उहाँ यी चिठी लगभग दुइ हजार वर्ष आघ “यहूदी ख्रीष्टीयनहुँकन”‡ लिखलह।

* **यरूशलेम:** इस्राएल देशम याकूब ओ येशूक समयम यरूशलेम एकठो महत्वपूर्ण शहर रह। थप जानकारीक लाग “यरूशलेम” शब्दक अर्थ हेरी।

† **मण्डली:** मण्डली कलक परमेश्वरक आराधना कर्ना उद्देश्यले जमघट हुइल ख्रीष्टीयनहुँकनहक समाज हो। थप जानकारीक लाग “मण्डली” शब्दक अर्थ हेरी।

‡ **यहूदी ख्रीष्टीयनहुँकन:** ग्रीक भाषक स्रोतमसे यी वाक्यांश, “यहूदी ख्रीष्टीयनहुँकन”, शाब्दिक रुपम अनुवाद कर्ना हो कलसे “बार कुल” कना हुइठा। वास्तवम “बार कुल” कलक अब्राहामक नट्या याकूबक बार भाइ छावन्हक सन्तान हुइटा। याकूब अघट्टेक मनै रलह (थप जानकारीक लाग “याकूब” शब्दक अर्थ हेरी)। मनै हुँकाहार सन्तानन् यहूदी कहँट (थप जानकारीक लाग “यहूदी” शब्दक अर्थ हेरी)। उ यहूदीहुँक संसारभर छिट्कल, तर फे हुँक आपन कूलक हिसाबले चिहन्जाइँट। येशूक बारेम खुशिक खबर

चिठी पउइयन्हक बारेम

याकूबक काम यरूशलेम मण्डलीम मुख्य अगुवक रुपम रलकओसे, उहाँ धेरजसिन यहूदी ख्रीष्टीयनहुँकनसे अन्तरक्रिया करँट। मनै स्तिफनसह पत्थले मार्क मुवैल (प्रेरित ७:५७-६०) त यरूशलेम मण्डलीक ख्रीष्टीयनहुँक तितरबितर होक संसारभर फैलल। तबदोस्र उ ख्रीष्टीयनहुँक यरूशलेमम एकसाथ भेला होक संगती कर्ना संभव नैहुइलन। उहओसे याकूब हुँकन्हक अगुवक हिसाबले व्यक्तिगत रुपले भेटघाट कैक सिखाइ सम्भव नैहुइना यरूशलेमसे दूर रहल यहूदी ख्रीष्टीयनहुँकन उत्साह ओ आवश्यक सरसल्लाह देहक लाग यी चिठी लिखलह। उहाँ यी चिठी ख्रीष्टीयनहुँकन लिखलह कना बात २:१; ५:७-८ खण्ड पहर्लसे, स्पष्ट हुइठा। यी चिठी शुरुम यहूदी ख्रीष्टीयनहुँकन्हक लाग लिखल रलसे फे, यी सबजहन, यहूदी जात नैरहल मनैन फे, लागू हुइठा।

चिठीक विषयवस्तु

उ समयम ख्रीष्टीयनहुँक आजकाल्हिकअस पापम फँस्ना अवस्थम घरी-घरी पर्टीरहुँट। याकूब परमेश्वरसे दूर हुइना ओ आपन मनम पाप खेलैटी रना ख्रीष्टीयनहुँकन, यदि हुँक आपन-आपन पापी मन घुमाक परमेश्वरकठे नैअइना हो कलसे, हुँक पापक दोषी ठहाजैहीं कैक चेतावनी देहक लाग यी चिठी लिखलह।

संसारभर फैलल् त, कौनो-कौनो यहूदीहुँक फे ख्रीष्टीयन हुइल। उहओसे याकूब चिठी लिखवेर हुँकन परम्परागत हिसाबले सम्बोधन कर्ल, काकरकि हुँक बार कूलक हिसाबले चिहन्जाइँट। तर, वास्तवम उहाँक आशय “यहूदी ख्रीष्टीयनहुँकन” रलहन, जौन बात याकूबक यी किताबक १:१ म अनुवाद कैगैल्वा।

याकूब खास कैक येशू ख्रीष्टकूम विश्वास करल मनै कसिक जीवन जीएपठा कना बात सिखाइक लाग यी चिठी लिखलह। याकूबक समयम कौनो-कौनो ख्रीष्टीयनहुँक असल काम कर छोररखलह जसिन देखपठा, सायद काजेकलसे हुँक "मनै असल काम कैक मुक्ति नैपैट तर येशूकूम विश्वास कैक केल मुक्ति पैठ" कैक विचार करँट। यी विचार ठिक रलहन, तर हुँक "मनै असल काम कर्ना आवश्यक नैहो" कैक फे विचार करँट। हुँकन्हक अस्तै-अस्तै गलती विचारह सुधारक लाग याकूब यी चिठी लिखलह। हो, हम्र येशूकूम विश्वास कैक केल मुक्ति पैठी, तर हम्र करपर्ना असल कामह छ्वार नैपरट। येशूकूम करल हमार विश्वास हमार व्यवहारम देखपरपठा कैक उहाँ यी चिठीम शिक्षा देरखल। परमेश्वरक वचन अनुसार जीवन जीलसे, ख्रीष्टीयन जीवनक गुण बहर्ती जैना बात याकूब आपन चिठीम उल्लेख कैरखल।

याकूब पाठकहुँकन असल कामक महत्व लगायत और धेर बात जानकारी देहक लाग यी चिठी लिखलह। यी चिठी धेर वर्ष आघ लिखौलरलसे फे, चिठीक सब विषय हमार लाग आम्हीसम फे सान्दर्भिक बा। जस्त - आपत्विपत् कसिक सहना, पापम फँस्ना अवस्था, धनी ओ गरीब, पक्षपात, हमार बोलीवचन, परमेश्वरक दिहल बुद्धि, लराई ओ झग्रा, परमेश्वरसे पुकारा कर्ना बात आदि।

यी किताब प्रयोग कर्ना बारेम एक सल्लाह

अध्याय ओ पद कसिक बुझना?

यी किताबम वाक्यम या वाक्यक समूहम अङ्क लिखल बा। अङ्कले अल्गाजैना ओसिन वाक्यह या वाक्यक समूहह पद कैजिठा। धेर पदह एक समूहम कराक बरा खण्ड बनागैल बा। असिन बरा खण्डह अध्याय कैजिठा। अध्यायम फे अङ्क लिखल बा। अध्याय जनैना अङ्कक् आकार बरा-बरा बा, ओ पद जनैना अङ्कक् आकार छुटी-छुटी बा।

उहओसें यदि अप्न कौनोजहनसे यी किताबम या बाइबलक और किताबम रहल एकठो वाक्यक बारेम बट्वाइचाहटी कलसे, अप्न उ वाक्य अठे बा कैक कहसेकठी, अथवा उ वाक्यक ठेगाना ट्याक्क देखाइसेकठी। उदाहरणक लाग, यदि अप्न कौनोजहन पक्षपात कर्ना पाप हो कना बात बट्वाइचाहटी कलसे, अप्न असिक कह सेकठी, 'याकूब २:१-१३ पही'। याकर मतलब, अप्न याकूब किताब बिठ्नाक २ अध्यायक १ पदसे शुरु कैक १३ पदसम पही कहल हो।

मुस्किल शब्द कसिक बुझना?

यी किताबम मुस्किल शब्द या विचार धेर बा। पाठकहुँक मजासे बुझसेकहीं कना विचारले, मुस्किल शब्दक अर्थ सक्यासम दुई ठाउँम खुलैना कोसिस कैगिल बा: पैल्ह, मुस्किल शब्द रहल पन्नक पेन्डीम फुटनोटम, या दोस्र, किताबक पाछओर रहल "शब्दक अर्थ" कना अल्ग शीर्षक अन्तरगत।

फुटनोट:

मुस्किल शब्दक पाछ एकठो छिटिमिटि उठल् चिन्हा दिहल बा (उदाहरणक लाग: शैतान*)। ओ उह पन्नक पेन्डीम, उह चिन्हा (*) सहित, उ मुस्किल शब्दक अर्थ खुलाइल बा।

शब्दक अर्थ:

धेर मुस्किल शब्द मजासे बुझक लाग धेर अर्थ खुलाइपर्ना आवश्यकता हुइठा। उहओसे यी किताबक पाछओर, “शब्दक अर्थ” शीर्षक अन्तरगत, असिन शब्दक अर्थ बिस्तारित रुपम लिखल बा।

बाइबलक एकमुष्ठ बुझाइ ओ सम्बन्धित पदक ठेगाना:

इवाट्ट ह्यारबेर बाइबल एकठो किताब हो। तर बाइबलम धेर किताब जम्मा कैगिल बा, ओ उ किताब फरक-फरक समयम, फरक-फरक ठाउँम, ओ फरक-फरक मनै लिखलह। उ रलसे फे, वास्तवम बाइबल एक्कठो किताब हो, ओ बाइबलक लेखक फे एक्कठो हुइटा। उ लेखक परमेश्वर हुइटा।

याकर मतलब लेखकहुँक लिखबेर परमेश्वर हुँकन्हक मनम काम कर्टीरलह। पुरान नियमम परमेश्वरक बचन बोलुइया यशैयकअस, कबुकाल हुँक परमेश्वरक कहल बात सरासर लिखल। कबुकाल जुन, एक हिसाबले, हुँक आपन मनक बात लिखल, जस्त: ख्रीष्टीयनहुँकन पावलक लिखल चिठी। तर और हिसाबले, हुँक लिखबेर परमेश्वर काम कर्टीरलह। उहओसे, लेखकहुँक आपन हिसाबले लिखलसे फे, परमेश्वरक

विचार लिखल (२तिमोथी ३:१६)। उहाँक वचन लिखबेर,
हुँक परमेश्वरक आत्मक अधिनम रलह (२ पत्रुस १:२१)।

उहओसे बाइबलक एक ठाउँम लिखौल् एकठो घटना या
विचार बाइबलक और ठाउँम फेदोस्र लिखजैना अचम्मक बात
नैहो।

बाइबलम जम्माजम्मी ६६ ठो किताब बा, ओ पूरा
बाइबल खास कैक दुई भागम लिखल बा: पुरान नियम ओ
लौव नियम। पुरान नियमम ३९ ठो किताब बा, ओ लौव
नियमम २७ ठो किताब बा।

पुरान नियमम रहल किताबम, संसारक सृष्टिसे लेक येशू
ख्रीष्ट जर्मनासे ४०० वर्ष आघसम्मक सारा संसारक
इतिहासक बात लिखल बा। मनै पाप कैक परमेश्वरसे
सम्बन्ध बिगैलक बात हम्र देखी, तर परमेश्वर मनैन
हुँकन्हक पापमसे बँचाइक लाग एकठो मुक्ति देहुइयह पठैना
बाचा कर्ल। परमेश्वर इस्राएलीन हुँकन्हके वंशमसे मुक्ति
देहुइयह जर्माइक लाग रोज्ल।

पुरान नियमम परमेश्वर इस्राएलीन कसिक अगुवाइ कर्ल
ओ हुँकनसे कसिक व्यवहार कर्ल कना धेर जसिन इतिहासक
बात लिखल बा। परमेश्वरक वचन बोल्ना कौनो-कौनो
इस्राएलीहुँक मनैन हुँकन्हक पापमसे बँचाइक लाग भविष्यम
एकठो मुक्ति देहुइया अउइयाबाट कैक कहल बात फे हम्र
देखी। पुरान नियम पहर्लसे, येशू के हुइट, ओ उहाँ काजे
अइलह कना बातक मुख्य आधार थाहाँ हुइठा।

पुरान नियमम मनैन हुँकन्हक पापमसे बँचाइक लाग
एकठो मुक्ति देहुइयह पठैना परमेश्वरक करल बाचा लौव

नियमम पूरा हुइल् बात हम्र देख्ठी। मनैन मुक्ति देहुइया येशू ख्रीष्ट हुइट, ओ लौव नियमक पैल्ह चारठो किताबम, येशू के हुइट कना बात स्पष्ट रुपले लिखल बा।

याकूबक किताबम लिखल धेर बात बाइबलम और ठाउँम लिखल बातसे सम्बन्धित बा (याकूबक किताबक और ठाउँम फे हुइसेकी, या लौव नियमक और किताबम हुइसेकी, या पुरान नियमक कौनो किताबम हुइ सेकी)।

याकूबक किताबम लिखल बातसे मिल्ला बाइबलक और ठाउँम रहल ओसिन सम्बन्धित पद या खण्डक ठेगाना याकूबक किताबक सम्बन्धित पद या खण्डक पाछ कोष्ठम लिखल बा।

उदाहरणक लाग, याकूब १:११ म असिक लिखल बा:
“जब चरचरावा घाम लग्ठा, तब फूला ऐल्याजैठा ओ ल्वाभलगिटक फूला फे झर्जैठा। असिक फूलक स्वाभा हेराजैठस्। ओसहँक आपन कामकाजम दौरधुप कर्टी-कर्टी, धनी मनैन्हक जुनी ओराजैठन।”# वाक्यक अन्तम रहल चिन्हा (#) सम्बन्धित पद बा कना बात देखैठा। उ सम्बन्धित पद पाइक लाग अप्न उह पन्नक पेन्डीम ह्यारपठा, जहाँ टोरैया चिन्हक सँगसँग उह वाक्यक पद दिहल बा, यिहाँ १:११। वाकर पाछ, सम्बन्धित पद लिखल बा, यिहाँ यशै ४०:६-८। यी अवस्थम ७०० वर्ष आघ यशैयक लिखल बात आब याकूब आपन समयक मनैन्हक बारेम फे लिखल हो कैक बुइल।

यी तरिकाले पाठकहुँक बाइबलक और ठाउँम रहल
सम्बन्धित पदक ठेगानह फे असहँक बुझहीं, ओ पहल खण्डक
एकमुष्ठ जानकारी पाइसेकहीं कना आशा लेगैल् बा।

आबक लाग बाइबलम रहल किताब मध्येम मर्कूसक
लिखल किताब ओ याकूबक लिखल किताब केल दंगौरा थारु
भाषम प्रकाशित हुइलकओसे, पाठकहुँक सम्बन्धित पद या
खण्डक ठेगाना पाइक लाग नेपाली बाइबल पहपना
देखपठा।

विषय सूचि

खण्ड-खण्डक शिर्षक	अध्याय:पद
याकूब द्वागसलाम पठैठ	१:१
आपत्विपत् सहपठा	१:२-११
परमेश्वर मनैन पापम फँसाइ नैखोज्ट	१:१२-१८
परमेश्वरक वचन पालन करपठा	१:१९-२७
पक्षपात कर्ना पाप हो	२:१-१३
कामम नैलैजैना विश्वास मुवल विश्वास हो	२:१४-२६
सब जन आपन-आपन बोलीवचनह अधीन करपठा	३:१-१२
बुद्धिमान मनै परमेश्वरक चाहना अनुसार जीवन जीठ	३:१३-१८
विनम्र होक परमेश्वरक अधीनम रहपठा	४:१-१७
परमेश्वर थिचोमिचो कर्ना धनी मनैन चेतावनी देठ	५:१-६
दुखकष्टम धैर्य धारण करपठा	५:७-१२
परमेश्वरसे पुकारा कर्लसे, शक्तिशाली रुपले काम हुइठा	५:१३-१८
टैहर्कल विश्वासीह मजासे सम्झाबुझा पारपठा	५:१९-२०

याकुबक लिखल चिठी

याकुब द्वागसलाम पठैठ

१ परमेश्वर ओ प्रभु* येशू ख्रीष्टक† कमारा मै,
याकुब‡, यी चिठी संसारभर फैलल् दुह्ल यहूदी
ख्रीष्टीयनहुँकन§ लिखटुँ। सबजहन म्वार द्वागसलाम बा।#

आपत्विपत् सहपठा

२ हेरो भैयौ,** टुन्हकूम आपत्विपत् परिआजाइ कलसे फे,
बरा आनन्दित होओ। ३ दुह्ल सम्झलरहपर्ना बात यी हो:

* १:१ **प्रभु:** उ समयम मनै आदरणीय व्यक्तिह "प्रभु" कहँट।

† १:१ **परमेश्वर, येशू ख्रीष्ट:** थप जानकारीक लाग "परमेश्वर" ओ "येशू ख्रीष्ट" शब्दक अर्थ हेरी।

‡ १:१ **याकुब:** थप जानकारीक लाग शब्दक अर्थ हेरी।

§ १:१ **यहूदी ख्रीष्टीयनहुँकन:** थप जानकारीक लाग परिचय हेरी। सामान्य रुपम यहूदीन्हक बारेम थप जानकारीक लाग "यहूदी" शब्दक अर्थ हेरी।

१:१ मत्ती १३:५५; मर्क ६:३; प्रे १५:१३; गला १:१९

** १:२ **भैयौ:** ग्रीक शब्द "अदेलफोस"ह यिहाँ "भैयौ" कैक अनुवाद कैगैल् बा। ग्रीक भाषा बोल्ना मनै उ शब्दह विश्वासी डाडु-भाइ, दिदी-बहिनेन एकमुष्ठ रुपम बुझँट। ओ यिहाँ "भैयौह" ओस्टहँक बुझपठा।

आपत्विपत् दुह परमेश्वरकूम जाट्टीसे विश्वास* कठों कि नाहीँ कैक दुन्हक विश्वासक जाँच कठा। ओ उ जाँचले दुँहन आपत्विपत् मजासे सहसेक्ना क्षमता इन बहाइक लाग मौका देठा।

४उहओसे आपत्विपत् सहटीजाओ, त दुह परमेश्वरक चाहलअस पूरा परिपक्व हुइटीजैबो। दुन्हक मजा गुणम कुछु कमि नैरही।# ५तर यदि असिन अवस्थम का कर्ना कना बात दुह नैजन्टो कलसे, खुसी मनले देहुइया परमेश्वरसे बुद्धि माङ्गो। दुह बुद्धि मङ्गलो कटिम, उहाँ दुँहन हप्कुइया नैहुइटा। ६तर माङ्गबेर, परमेश्वरकूम विश्वास करपठा। शंका कर नैपरट, काकरकि बयालले बाँस हिलाइअस, शंका करुइयन्हक मन एकदमसे हिल्टीरठन।† ७ओसिन मनै, "परमेश्वरसे कुछु पैबी" कैक नैचितैलसे फे हुइठा। ८हुँक दुइ मन रहल मनै हुइटा ओ आपन मन परमेश्वर ओ संसार दुनुओर लगैलकओसे, हुँकन्हक सब चालचलन अस्थिर रठन।

* १:३ विश्वास: थप जानकारीक लाग "विश्वास" शब्दक अर्थ हेरी।

१:४ रोमी ५:३-४; १ पत्र १:६-७

† १:६ ग्रीक भाषक स्रोतमसे यी पदक शाब्दिक अनुवाद कर्लसे, असिन हुइठा: 'तर विश्वाससे माङ्गपठा, शंका नैकरपरट। शंका करुइया बयालले उठैना ओ झट्कना समूद्रक छल्काअस हो।'

१दुह गरीब भैयहुँक गर्व करपठा, काकरकि परमेश्वर दुँहन उठारखल।* १०ओसहुँक, धनी भैयहुँक नम्र हुइपर्लकूम गर्व करपठा, ओ धनी मनै हुँकन्हक धनसम्पत्ति समेत फूलाअस सुखजैठा। ११जब चरचरावा घाम लगठा, तब फूला ऐल्याजैठा

* १:९ यी पदक अर्थ परमेश्वर गरीब ख्रीष्टीयनहुँकन भौतिक हिसाबले धनी बनैहीं कना नैहो, तर उहाँ हुँकन धेर आशिष देक धनी बनैहीं कना हो, जौन आशिष सड्डभर आँखिले द्याख नैसेकजाइट। उदाहरणक लाग, परमेश्वर कैरखल कि जब हम्र विश्वासी हुइठी, तब हम्र परमेश्वरक धर्मपुत्र हुइठी (रोमी ८:१५), ओ उहाँ हमन ना त कबु छोर्ठ, ना त त्यागदेठ (हिब्रू १३:५), उहाँक चाहना अनुसार जीवन जीएक लाग लौव क्षमता हमन देजैठा (२ कोरिन्थी ५:१७), हमन उहाँक आत्मा देगैल् बा जौन आत्मा हमार जीवनम ख्रीष्टक धेरसे धेर चारित्रिक गुण विकास करक लाग हमन सहायता कठ (गलाती ५:२२-२३), आदी। एफिसी १ अध्याय फे हेरी। थप जानकारीक लाग "परमेश्वरक आत्मा" शब्दक अर्थ हेरी।

†१:१० यी पदम याकूबक कहल बात हम्र धेरजन्हक सौँचाइक ठीक उल्टा बा। यदि कौनो व्यक्ति धनी बाट कलसे, उ व्यक्ति पक्क फे शान्ति ओ खुसीम बाट कैक हम्र विचार कठी। तर येशू कल, "लोभी जिन होओ! धेर चिजिक मालिक रलसे फे जीवन सुरक्षित नैरहट।" ओ आपन बात स्पष्ट पारक लाग धनी मनैयक बारेम एकठो कथा सुनैल। उ धनी मनैया अप्न सुरक्षित बाहुँ कैक सौँच्लरह, तर वास्तवम उ सुरक्षित नैरह (लूका १२:१५-२१)। अस्तक और ठाउँम, गरीब रलसे फे खुसी हुइना, ओ धनी रलसे फे बेखुसी हुइना सम्भव बा कैक बाइबल हमन देखैठा (अय्यूब ३४:१९; भजनसंग्रह ४६:१६-१९; उपदेशक ५:१२; लूका १६:१९-३१; फिलिप्पी ४:११-१२; १ तिमोथी ६:९-१०; हिब्रू १३:५)। अत्र केल नैहोक, यर्मिया ९:२३-२४ म कहल बा कि धनी मनै आपन धनम गर्व कर नैपरट, तर परमेश्वरह चिहत्लकूम गर्व कर पठा।

ओ ल्वाभलग्टिक फूला फे झर्जेठा। असिक फूलक स्वाभा हेराजैठस। ओसहूँक आपन कामकाजम दौरधुप कर्टी-कर्टी, धनी मनैन्हक जुनी ओराजैठन।#

परमेश्वर पापम फँसाइ नैखोज्ट *

१२आपत्विपत् परिअइलसे फे, परमेश्वरकम विश्वास करलरना मनै उहाँसे आशिष पैठ। हुँक आपत्विपत् सहक आपन विश्वास सक्कली रहल बात प्रमाणित कठ, ओ हुँक स्वर्गम† सड्डभर परमेश्वरकसँग रहपैना जीवन‡ पैठ। परमेश्वर उहाँह प्रेम कर्ना मनैन उ जीवनक पुरस्कार देना बाचा कैरखल। १३यदि पापम फँसना अवस्था आगैलसे, कुई "परमेश्वर महीह पापम फँसाइक लाग बाट" कैक जिन स्वाँच, काकरकि परमेश्वरह पाप काम कर्नास लगबो-

सुखजैना फूलाअस धनसम्पत्ति अस्थायी रठा ओ एक्कघरी हेराजैठा, तर परमेश्वरह चिह्नलसे, सड्डभर आशिषक नतिजा अइठा। यी अर्थम, नम्र होक ख्रीष्टकम विश्वास करल धनी व्यक्ति गर्व कर ओ खुसी हुइ सेकठ। धनी व्यक्ति आपन धनसम्पत्ति स्वर्गम लैजाइ नैसेकलसे फे, उ व्यक्ति सबसे बरा आशिष पैटीरहुइयाबाटा। उ आशिष हो: परमेश्वरह चिह्नना ओ सड्डभर उहाँकसँग जीए पैना।

१:११ यशै ४०:६-८; भज ४९:१६-१७

*१:१२ **पापम फँसैना:** थप जानकारीक लाग "पापम फँसैना" शब्दक अर्थ हेरी।

† १:१२ **स्वर्ग:** थप जानकारीक लाग "स्वर्ग" शब्दक अर्थ हेरी।

‡ १:१२ **परमेश्वरकसँग सड्डभर रहपैना जीवन:** थप जानकारीक लाग "परमेश्वरकसँग सड्डभर रहपैना जीवन" शब्दक अर्थ हेरी।

लग्बोनैकर्दन, ओ उहाँ किहुह पापम फँसाइ फे नैखोज्ट। १४मनै आप्पन खराब चाहनम लोभ्याक पापम फँस्ना अवस्थम पठा। १५उह चाहनले मनैन पाप कामम लैजैठा, ओ ओसिन पाप कामम लग्गरना मनै अन्तिमम मुजैठा*।

१६हेरो भैयौ,† परमेश्वरक बारेम गल्ती हिसाबले विचार जिन करो, १७काकरकि हरेक असल ओ सिद्ध वरदान स्वर्गक परमेश्वरसे केल अइठा। उहाँ आकाशम चम्कना दिन, जोन्हया, ओ टोरैया बनैल। असिन चम्कना चिज एक ठाउँम पल नैरहट, ओ छैहयाँ फेरबदल हुइटीरठा, तर परमेश्वरक गुण कबु फे फेरबदल नैहुइटन। १८उहाँ आपन इच्छा अनुसार सत्य वचनले हमन लौव जीवनम जमैल। उहाँक करल

* १:१५ वास्तवम पाप कर्लसे फे, नैकर्लसे फे, सब जन मुठ। तर बाइबलम दुइ किसिमक मृत्युक बारेम लिखल बा। एकठो मृत्यु स्वाभाविक शारीरिक मृत्यु हो। उ मृत्यु सब जन अनुभव कर पठा। परमेश्वरसे रहल हमार सम्बन्धक आधारम और किसिमक मृत्यु फे हुइठा। उहओसे उ मृत्यु शारीरिक मृत्युसे फरक बा। तर जसहँक शारीरिक मृत्युम हम्र जीटीरना संसारमसे अलग हुइठी, ओसहँक द्वासर किसिमक मृत्युम हम्र परमेश्वरसे, उहाँसे सम्बन्ध जोर्ना सम्भावनासे, ओ उहाँक उपस्थितिम रहक पैना सत्य शान्ति ओ आनन्दक अनुभवसे अलग हुइठी। यदि हम्र आपन-आपन पापी मन घुमाक परमेश्वरकठे नैअइना हो ओ मुक्ति पाइक लाग ख्रीष्टकूम विश्वास नैकर्ना हो कलसे, हमन द्वासर किसिमक मृत्युक अनुभव कर परी कैक बाइबलम लिखल बा (रोमी ६:२३)। थप जानकारीक लाग "आपन पापी मन घुमाक परमेश्वरकठे अइना" शब्दक अर्थ हेरी।

† १:१६ **भैयौ:** ग्रीक भाषक स्रोतमसे यी शब्दक शाब्दिक अनुवाद कर्लसे, असिन हुइठा: 'प्रिय भैयौ'।

सृष्टिमध्येम हम्न सबसे मूल्यवान हुइसेकी कैक उहाँ यी काम कर्ली।*

परमेश्वरक वचन† पालन करपठा

‡ हेरो भैयौ, † यी बात सम्झलरहो: बात ध्यान देक सुनक लाग सड्डभर तयार रहपठा, होस कैक ब्वालपठा, ओ झनक्क रिसाजाइ निपरट्, २० काकरकि मनैन्हक जीवनम रहल पापी रिसहऽ परमेश्वर ठीक नैठहैटा।** २१ उहमार सब

* १:१८ सत्य वचन कलक खुशिक खबर हो। जब हम्न खुशिक खबरम विश्वास कर्ठी, तब हम्न परमेश्वरक एकठो सन्तानक रूपम उहाँक परिवारम लौव जरम पैठी (यूहन्ता ३:१-२१), ओ लौव जीवन जीए सेकठी (२ कोरिन्थी ५:१७-१९)। यी लौव जीवन कलक द्वासर जुनी कहल नैहो, तर परमेश्वरक सम्बन्धम रहक जीना जीवन हो। थप जानकारीक लाग "खुशिक खबर" शब्दक अर्थ हेरी।

† १:१९ **परमेश्वरक वचन:** थप जानकारीक लाग "परमेश्वरक वचन" शब्दक अर्थ हेरी।

‡ १:१९ **भैयौ:** ग्रीक भाषक स्रोतमसे यी शब्दक शाब्दिक अनुवाद कर्लसे, असिन हुइटा: 'प्रिय भैयौ'।

§ १:२० रिसैना सड्डभर पाप नैहो कना बात येशूक करल काम (मर्कूस ११:१५-१७) ओ एफिसी ४:२६ म पावलक कहल बात पहरक हम्न थाहाँ पैठी। तर रिस धेर जसिन पापी रठा, काकरकि रिस मनैन्हक स्वार्थी चाहनम बाधा हुइलसे लगठा। ख्रीष्टीयनहुँकर होशियार हुइपठा, काकरकि रिसाइल मनैन्हक जीवनम शैतान सजिलोसे काम कर्ना मौका पाइसेकठा (एफिसी ४:२७)।

** १:२० **ठीक ठहैना:** थप जानकारीक लाग "ठीक ठहर्ना / ठीक ठहैना" शब्दक अर्थ हेरी।

खराब विचार ओ खराब काम आपन जीवनमसे हटादेओ।
नम्र होक टुन्हक मनम बोगैल् परमेश्वरक वचनक#अधिनम
रहो, काकरकि उ वचनम टुँहन मुक्ति* देना शक्ति बा।†

२२असिक उहाँक वचन पालन करुइया होओ, सुनुइया केल
नाहीं। परमेश्वरक चाहना कलक वचन सुन्ना केल हो कैक
अपन्हेह धवाखा देहुइया जिन होओ। २३यदि टुह वचन सुन
केल सुन्ठो, तर पालन नैकर्टो कलसे, टुह त ऐनम आपन मुह
हेर्ना मनैयाअस हुइतो। २४टुह ऐनम अपन्हेह हेर्लसे फे, ह्यार
छोर्टीकि, "मै कसिन रनहुँ" कना धेर बातक जानकारी जातसे
बिस्राडर्तो। २५ओसहँक टुह वचन सुन्क बिस्राडर्ना नाहीं, तर
यदि परमेश्वर मनैन पापक दण्डमसे छुटकारा देहक लाग
प्रयोग कर्ना असल वचनम ध्यान लगैलो ओ पालन कर्लो
कलसे, टुन्हक कामकाजम परमेश्वर आशिष देहीं।

१:२१ यर्मिया ३१:३३

*१:२१ **मुक्ति:** थप जानकारीक लाग "मुक्ति" शब्दक अर्थ हेरी।

† १:२१ हमन बँचाइक लाग येशू मुल (यूहन्ना ३:१६) ओ मुवलमसे तीसर
दिनम फेदोस्र जीगैल (मर्कूस १६:१-८; १ कोरिन्थी १५:१-७) कना खुशिक
खबरम विश्वास कैक हम्र मुक्ति पैठी। थप जानकारीक लाग "खुशिक खबर"
शब्दक अर्थ हेरी। तर हमार जीवन परिवर्तन हुइलक फारा दैनिक जीवनम
देखपरपठा (याकूब २)। परमेश्वरक वचन ध्यानपूर्वक सुन्क पालन कर्लसे,
असिन फारा फर्ठा (मर्कूस ४:३-२०; याकूब १:२२-२७; १ पत्रुस १:२३-
२:२)। थप जानकारीक लाग "मुवलमसे फेदोस्र जीना" शब्दक अर्थ हेरी।

२६यदि दुह् अपन्हेह "मै परमेश्वरक चाहना अनुसारक काम कर्तुँ" कैक सौँचो, तर जथाभाबी बोल्टीरठो कलसे, दुह् अपन्हेह धवाखा देठो। दुन्हक धर्म बेकार हो। २७यदि दुह् विधवन ओ दुवर लर्कन हुँकन्हक आपत्विपत्म सहायता कठोँ ओ आपनम संसारक पापक दाग लाग नैदेठो कलसे, दुह् जाट्टीसे परमेश्वर बाबक चाहना अनुसारक जीवन जिउइयन हुइठो। उह हो सक्कली धर्म।

पक्षपात कर्ना पाप हो

२ हेरो भैयौ, यदि दुह् महान ओ शक्तिशली परमेश्वर* हमार प्रभु येशू ख्रीष्टकूम जाट्टीसे विश्वास कठोँ कलसे, कबु फे पक्षपात जिन करो। २मानिले, दुन्हक संगतीम स्वानक मजा-मजा मुन्द्री ओ धेर महड लुगा लगैल एकठो धनी मनैया आइल, ओ फाटल-फाटल लुगा लगैल और गरीब मनैया फे आइल। ३यदि दुह्, धनी मनैयह आदर कर्ती, "अपन यिहिँम बैठी" कठो, तर गरीब मनैयह "टैँ उहँरे ठह्यैल रोह" या "भुइँयम बैठ्जा" कठो कलसे, ४उ त सरासर आप्पन समाजम

* २:१ महान ओ शक्तिशली परमेश्वर: ग्रीक भाषक स्रोतमसे यी वाक्यांशक शाब्दिक अनुवाद नेपालीम करलअस 'महिमा' हुइठो, जौन थारूभाषम बुइन्ता सजिलो नैहो। यी शब्द ख्रीष्टक पदक रुपम प्रयोग हुइल देखपठा, ओ याकर अर्थ उहाँ परमेश्वरक उपस्थितिक प्रतिनिधित्व कठ ओ परमेश्वरसे बराबर बाट कहल हो।

पक्षपात करल होगैल् नि। दुह् त खराब विचारले न्याय कर्ना भ्रष्टाचारी न्यायधिशअस होरलो।

५हेरो भैयौ, विश्वासले धनी हुहीं कैक परमेश्वर संसारक हिसाबले गरीब मनैन रोज्ल। परमेश्वरक राज्यक धनम अधिकार करपैना मनै हुँकहे हुइट, काकरकि परमेश्वर उहाँह प्रेम कर्ना मनैन उ धन देना बाचा कैरख्ल।# ६तर दुह् त गरीबन्हक अपमान कठों। वास्तवम अत्याचार कैक बिनसँटिक दोष लगाइक लाग, धनीय मनै दुँहन बलजब्री न्याय करुयन्हकठे नैलैजैट का? ७येशूक बदनाम करुइयन हुँकहे नैहुइट का? ओ दुह् उहाँकऽ मनै हुइटो ओ उहाँकऽ उच्च नाउँले परिचित बाटो।

८हुइना त यदि दुह् परमेश्वरक वचनम उहाँक देहल नियम अनुसार जाट्टीसे चल्लो कलसे, दुह् एकदम ठीक कर्टीबाटो। हमार राजा परमेश्वरक नियम यह हो, "और मनैन फे अपन्हेहअस प्रेम करो।"† ९तर यदि दुह् पक्षपात कठों कलसे, दुह् पाप कर्टीबाटो, ओ परमेश्वरक नियम अनुसार नैचल्लक प्रमाण त उह हो। १०काकरकि यदि कौनो मनैया परमेश्वरक सक्कु नियम पालन कर्टी-कर्टी, एक्कठो नियमम चुकल कलसे

२:५ लेवी १९:१८

† २:८ **परमेश्वरक राज्यक धन:** यी पदम उल्लेख हुइल धनसम्पत्ति हम्र स्वर्गम परमेश्वरक भविष्यक राज्यम पैना चिजह जनैठा। थप जानकारीक लाग "परमेश्वरक राज्य" शब्दक अर्थ हेरी।

फे, उ सक्कु नियम पालन नैकरल बराबर परमेश्वरक आघ ओत्रह दोषी हुइठा। ११वास्तवम "हत्या जिन करो" कहुइया परमेश्वर जो "व्यभिचार जिन करो" कलह। उहओसें यदि दुह हत्या नैकलसे फे, व्यभिचार कलों कलसे, दुह नियम भङ्ग करुइयन हुइठो।*#

१२परमेश्वर मनैन पापमसे छुट्कारा देना वचनक आधारम दुन्हक न्याय कठ। यी बात दुह जन्लरहपठा, ओ उहअनुसार दुन्हक बोली ओ व्यवहार मजा हुइपठा। १३ओ जे औरजहन दया नैकरट्, वाकर न्याय करबेर, परमेश्वर फे दया करुइया नैहुइटा। तर औरजहन दया कर्ना मनै परमेश्वर न्याय करबेर, एक्को नैडरैटा।†

* २:११ ग्रीक भाषक स्रोतमसे यी पदक शाब्दिक अनुवाद कलसे, असिन हुइठा: "व्यभिचार जिन करो" कहुइया परमेश्वर जो "हत्या जिन करो" कलह। उहओसें, यदि दुह व्यभिचार नैकलसे फे, हत्या कलों कलसे, दुह व्यवस्था भङ्ग करुइयन हुइठो।

२:११ प्रस २०:१३-१४; व्य ५:१७-१८

† २:१३ ग्रीक भाषक स्रोतमसे यी पदक शाब्दिक अनुवाद कलसे, असिन हुइठा: दया नैदेखैना मनैयक न्याय विना दयक हुइनेबाटस। दया न्यायह जित्ठा।

कामम नैलैजैना विश्वास मुवल विश्वास हो

१४ हेरो भैयौ, यदि कौनो मनैया "मै परमेश्वरकम विश्वास कर्तुं"* त कठा, तर उहाँक इच्छा अनुसार काम नैकरट् कलसे, का फाइदा? ओसिन मनैन परमेश्वर बँचैहीं का? १५ मानिले कौनो विश्वासी भैया या बहिनेकठे आवश्यक लुगाफाटा नैहुइत्स, ओ ओहीह दिन-दिनऽ खाइ फे नैपुगटस। १६ यदि टुह्ममध्ये कुई ओहीह "मज-मज रहहो, टुँहिन खैना, लगैना प्रशस्त पुग" केल कठा, तर ओहीह आवश्यक परल चिज कुछु फे नैदेहट् कलसे, का फाइदा? १७ ओसहँक यदि टुह्ममध्ये कुई "मै परमेश्वरकम विश्वास कर्तुं" कह केल कठा, तर विश्वास अनुसारक काम नैकरट् कलसे, वाकर विश्वास बिनकामक विश्वास हुइत्स, उ त, मुवल विश्वास हुइत्स।

१८ तर कुई महीह पुछी, "का टुँ जाट्टीसे परमेश्वरकम विश्वास कर्तो?" मै ओहीह कहम, "मै त उहाँक आज्ञा अनुसार काम कैरखनु। परमेश्वरक आज्ञापालन+ कर्ना काम बाहेक, और कौन तरिकाले टुँ उहाँकम विश्वास करल बात देखाइसेकबो? तर मै उहाँकम विश्वास कर्तुं कना बात त, मै आपन कामले देखाइसेकर्तुं।" १९ परमेश्वर एक्कठो बाट कना

* २:१४ परमेश्वरकम विश्वास कर्ना कलक हम्न मुक्ति पाइक लाग येशू ख्रीष्टकम विश्वास कर्ना ओ दैनिक जीवनम उहाँकम भरोसा कर्ना हो। याकूब १:२१ म रहल फुटनोट हेरी।

† २:१८ **आज्ञापालन:** थप जानकारीक लाग "आज्ञापालन" शब्दक अर्थ हेरी।

बात टुँ विश्वास कठो। उ मजा हो। तर एक बात सम्झलरहो
कि ओसिक त भूत फे विश्वास कठ ओ डरकमार लगलगैठ,
काकरकि परमेश्वर हुँकन दोषी ठहुइयाबाट।

२०का टुँहार एक्को अक्किल नैहो? "मै परमेश्वरकूम
विश्वास कटुँ" कना, तर उहाँकूम जाट्टीसे विश्वास करल
काम नैदेखैना मनैयक विश्वास बेकार हुइटस कना बात टुँ
नैबुइटो का? २१हमार पूर्वा अब्राहामक* बारेम विचार करो
ना। काजे परमेश्वर हुँकहीन ठीक ठहैलह? उ ज्या काम कर्ल,
उह कारणले नैहो का? उ आपन छावा इसहाकह बलि
चहाइक लाग परमेश्वरक आघ लैगैलह।†#

* २:२१ **अब्राहाम:** थप जानकारीक लाग "अब्राहाम" शब्दक अर्थ हेरी।

† २:२१ यिहाँ याकूबक कहल बात रोमी ४:१-२४ म लिखल बातसे तुलना
करी, जहाँ अब्राहाम विश्वासद्वारा धर्मी ठहर्लह कैक पावल कठ। पावलक
लिखल बात ओ याकूबक लिखल बात एक-आपसम नैटक्करैटन, तर याकूब
हमार विश्वास सक्कली हो कि नाही कैक प्रमाणित कर्ना कामह जोर देठ।

२:२१ उत २२:१-१४



अब्राहाम आपन छावा इसहाकह बलि चहाइक लाग
परमेश्वरक आघ लैगैल

२२परमेश्वरक आज्ञापालन कर्लकओसे, हुँकाहार विश्वास छुट्ट नैरलहन, तर कामम जोरगैल् रलहन कना बात स्पष्ट हुइठा। हुँकाहार करल काम विश्वास कर्लक प्रमाण रलहन। उह कामले उ परमेश्वरकम जाट्टीसे विश्वास कैरखलह कना बात देखैठा। २३"अब्राहाम परमेश्वरकम विश्वास कर्ल, ओ परमेश्वर हुँकहीन ठीक ठहैल" कैक परमेश्वरक वचनम लिखल बात हुँकाहार करल कामले पक्का साबित कर्ठा। उहओसे हुँकहीन परमेश्वरक संघारी कैगिल बा।# २४-२५राहाब

बेश्यक* बारेम विचार करो ना। हुँकाहार करल कामकमार जो परमेश्वर हुकहीन अब्राहामकअस ठीक ठहैलह। उ सुराकी कर गैल् इस्राएलीन नुकैलही ओ और डगरओसे सुरक्षित रुपम भागक लाग हुँकन मदत कर्लही।# विश्वास कैक केल नैहुइट्, तर विश्वासमसे आइल काम करुइयह परमेश्वर ठीक ठहैठ कना बात आब देख्लो? २६जसहुँक प्राण नैरहल शरीर मुवल शरीर हो, ओसहुँक कामम नैलैजैना विश्वास फे मुवल विश्वास हो।

सब जन आपन-आपन बोलीवचनह अधीन करपर्ठा

३ श्हेरो भैयौ, दुह्ममध्ये धेर जन मण्डलीम+
परमेश्वरक वचन सिखुइया हुइ जिन खोजो,

* २:२४-२५ **राहाब बेश्या:** हुँकहीन राहाब बेश्या कलक मतलब उ सुराकी कर गैल् इस्राएलीन नुकाइल समयम बेश्या काम कर्तीरही कहल नैहो, या परमेश्वरकूम विश्वास करलठेसे पाछ फे बेश्या काम कर्ली कना बात नैहो। बाइबलम कबुकाल मनै पैल्ह जसिक चिहन्जाइँट्, पाछ फे उह हिसाबले चिह्नौल्वाट, जसिन कि सिमोन कुष्ठरोगी (मर्कूस १४:३)। ओसहुँक राहब परमेश्वरकूम विश्वास कर्नासे आघ बेश्या काम कर्लकओसे, उ राहब बेश्यक रुपम चिह्नौली।

२:२४-२५ यहो २:१-२१

† ३:१ **मण्डली:** थप जानकारीक लाग "मण्डली" शब्दक अर्थ हेरी।

काकरकि परमेश्वर हम्प्र सिखुइयन्हक न्याय औरजन्हकसे करी
 हिसाबले करुइया बाट कैक त टुह जल्लबाटो।* २वास्तवम हम्प्र
 सब जन भूलचूकम धेर गल्ली कैडठी।† बोलीवचनम कब्बु
 गल्ली नैकर्ना मनै परमेश्वरक चाहल अनुसारक परिपक्व मनै
 हुइटा। हुँक अपन्हेह पूरा अनुशासनम ढलरठ।

‡कहल मान कैक घोरोक मुहम कैजा लगाजैठा। तबदोस्र
 घोरोक पूरा शरीरह जहाँर मन लागल, उहँरे लैजाइ सेकजैठा।
 §पानीजहाजक बारेम फे विचार करो ना। उ बरा-बरा रठा
 ओ बर्का बयालले चल्ठा। तर फे, वाकर पाछओर रना एकठो
 छिटिमिटि साधनले,‡ जहाज चलुइयन ओहीह जहाँर मन
 लगलन्, उहँरे लैजाइसेकठ। ¶ओसहँक मुह एकठो छिटिमिटि
 अङ्ग रलसे फे, बरा-बरा बातक घमण्ड कर्ठा।

आगिक छिटिमिटि झिल्लके सारा बन्नोम राहू लागजैठा।
 §हमार खराब बोली आगिक झिल्लाअस हो। धेर किसिमक
 पाप मुहओसें निक्कठा ओ सारा जीवनम दाग लगादेठा।

* ३:१ **सिखुइयन्हक न्याय औरजन्हकसे करी:** सिखुइयन्हक प्रभाव धेर रना
 हुइलकओसें, यदि हुँक आपन वचनले मनैन बहकैल कलसे, हुँकन्हक न्याय
 औरजन्हकसे करी हिसाबले हुइइयाबाटन (मत्ती २३:१-३३; लूका २०:४६-
 ४७; हिब्रू १३:१७)।

† ३:२ बोलिवचनम गल्ली कर्ना कलक पाप वचन बोल्ता फे हो। जसिन कि
 झुट बोल्ता, चुक्ली लगैना, पिठ्यापाछ आनक बात बटोइना, बदनाम कर्ना,
 सराप देना, आदि।

‡ ३:४ **पाछओर रना एकठो छिटिमिटि साधन:** यी जहाजम जोरगैलू लाउ
 चलैना एकठो डब्लाअसक एकठो नम्मा चिज रह।

वास्तवम खराब बोली शैतान* ओ नरकमसे† अइठा, ओ
हमार सारा जीवनम आगी लगाइ फे सेकठा।‡

‡चिरैँ, मच्छी, घस्रना जीवजन्तु लगायत सब किसिमक
जीवजन्तु मनैन्हक अधीनम रहसेकठ, ओ बाट फे, ओ
मन्साइल रठ। †तर आपन खराब बोलीह भर, कुई फे
सड्डभर अधीन कर नैस्याकट। खराब बोली निप्चक लाग
मनैयक मुहम झुल्लरठा। मुवैना विषअस, खराब बोली बरा-
बरा विनाश फे करैठा। ‡हम्र यिह मुहले परमेश्वर बाबक
आराधना कठी ओ यिह मुहले परमेश्वरक आपनअस बनाइल
मनैन सराप फे देठी।§ १०एक्क मुहमसे आराधना ओ सराप

*३:६ **शैतान:** थप जानकारीक लाग "शैतान" शब्दक अर्थ हेरी।

†३:६ **नरक:** थप जानकारीक लाग "नरक" शब्दक अर्थ हेरी।

‡ ३:६ हुइना त याकूब यिहाँ मनैन्हक बोल्ता बोलीक बारेम केल बट्वाइट,
तर बाइबलक और खण्ड पहर्क हम्र का बुझी कलसे, 'मनम रहल बात जो मनै
मुहले बोल्ड' (मत्ती १२:३४; लूका ६:४५)।

§३:९ **परमेश्वरक आपनअस बनाइल मनैन:** उत्पत्ति १:२६ म परमेश्वर कठ,
"मनैन आपनअस बनाई" यी बात परमेश्वर मनैन्हक बारेम केल कठ, ओ और
कौनो सृष्टिक बारेम असिक नैकट। याकर मतलब मनै परमेश्वरअस सर्वज्ञानी
ओ सर्वशक्तिमान बाट कहल नैहो, तर कहखाजल बात का हो कलसे,
परमेश्वर मनैन सौँच्चा / तर्क कर्ना, ओ भाषा प्रयोग कैक बातचित कर्ना
क्षमता सहित बनारखल। मनैन्हक भावना बाटन, ओ हुँक कुछ हदसम आपन
गन्तव्य निर्धारण कर फे सेकठ। परमेश्वरक करल सृष्टिमध्ये और जीवजनावर
असिन काम कर नैसेकट। मनै परमेश्वरअस बनागैलकओसे, यदि हम्र मनैन
सराप देठी कलसे, हम्र परमेश्वरह अनादर कर्तीबाटी।

अइठा। हेरो भैयौ, असिन नैहुइपर्ना हो। ११एक्क मुहानमसे मीठ ओ नैमीठ पानी अइठा का? १२हेरो भैयौ, अञ्जीरक



अञ्जीरक रुखा



जैतुनक रुखा

रुखोम जैतुन, या अङ्गुरिक ब्वाँटिम अञ्जीर फर्ठा का? * ओसहँक नैमीठ पानीक मुहानमसे मीठ पानी नैआइट्।

बुद्धिमान मनै परमेश्वरक चाहना अनुसार जीवन जीठ

१३ टुह अपन्हेह "मै बुद्धिमान बाटुँ ओ परमेश्वरक इच्छा अनुसारक जीवन जीए जन्तुँ" कैक सम्झुइयन असल जीवन जिलक प्रमाण देखाइपठा। यी असल जीवनम टुह सब काम नम्र होक बुद्धिमानी हिसाबले करपठा। १४तर यदि टुह एकदम बिह मुना बाटो ओ स्वार्थी हिसाबले आपन चाहना केल आघ सार चहठो कलसे, टुह घमण्डी हिसाबले "मै बुद्धिमान बाटुँ" कैक झुठ नैबोल्लसे हुइठा। १५असिन सौँचाइ

* ३:१२ अञ्जीर, जैतुन: थप जानकारीक लाग "अञ्जीर" ओ "जैतुन" शब्दक अर्थ हेरी।

स्वर्गक परमेश्वरसे नैआइट्, तर यी संसारमसे, मनैन्हक आपन चाहनमसे, ओ भूतन्हक प्रभावमसे अइठा। १६काजेकलसे जहाँ बिह्न मुना ओ स्वार्थी मनै रठ, उहाँ गन्जागोल ओ सब किसिमक खराब काम हुइठा। १७तर परमेश्वरक देहल बुद्धि अनुसार जीवन जीना मनै कसिन रठ कलसे, सबसे पैल्ह त, हुँकन्हक मन खराब बातओर लागल नैरटन। उहाँसेकी, हुँक सबजहनसे मेलमिलापम जीठ। हुँक आनक अवस्था बुझदेठ। हुँक नम्र ओ धेर दयावान रठ, ओ भलाईक काम कैदेठ। हुँक पक्षपात नैकर्ट। हुँकन्हक मनम कपट नैरटन। १८एकआपसम मेलमिलापम जीना मनै असिन रठ: हुँक मेलमिलापक बीया बुइठ। अन्तम वाकर फारा जुन हुँक सब जन परमेश्वरद्वारा ठीक ठहाजैठ हो।*

विनम्र होक परमेश्वरक अधीनम रहपर्ठा

४ १काजे दुह एकआपसम लराई ओ झग्रा कर्टीरठो? दुन्हक स्वार्थी चाहनाले नैहो का? जौन हरेक मनैयक मनम हुँकन्हक असल विचारसे लराई कर्टीरठा। २बिह्न मुना हुइलकओसे दुह लराई ओ झग्रा करभिर्जेठो। दुह कौनो चिज पाइक लाग धेर चाहना कठो, ओ यदि दुन्हक चाहना पूरा

* ३:१८ ग्रीक भाषक स्रोतमसे यी पदक शाब्दिक अनुवाद कर्लसे, असिन हुइठा: धार्मिक फरा फरैना बीया मेलमिलाप करैना मनैद्वारा बोजैठा।

नैहुइल् कलसे, दुह् दुँहन बाधा पुगैना मनैन्हक हत्या कैडठों।*
 दुन्हक चाहना पूरा नैहुइट्, काकरकि दुह् परमेश्वरसे
 नैमङ्गटो। ३परमेश्वरसे माङ्गीडर्लसे फे, दुन्हक माङ्गल चिज
 उहाँ दुँहन नैदेट, काकरकि दुह् उहाँक देहल आशिष पैलसे,
 मोजमजा करक लाग गलती विचारले मङ्गटो। ४दुह् त आपन
 गोस्सेह छोर्क औरजहनसे लगना जन्नीअस हुइटो। परमेश्वरह
 छोर्क यी संसारक खराब चालचलनम लगना मनै परमेश्वरक
 विरोध करुइयन हुइट कना बात दुह् जन्लरहपर्ना नैहो का?
 उहओसें यदि कुई यी संसारक खराब हिसाबले चल्ठा कलसे,
 उ परमेश्वरक शत्रु हो। ५"हमारम परमेश्वरक डारल आत्मा
 धेर बिह् मुठा"† कना बात वचनम बिना अर्थक लिखल बा

* ४:२ **हत्या कैडठों:** कौनो-कौनो बाइबल विद्वानहुँक यिहाँ प्रयोग हुइल्
 "हत्या" शब्दह आलङ्कारिक रुपम लेठ (मत्ती ५:२१-२२)। और जन जुन
 यहीह वास्तविक हत्या कहल हो कठ, काजेकलसे जब कुछु चिज पैना एकदम
 बलगर चाहनम बाधा पुगठा, तब हत्या हुइ फे सेक्ना बात देखपर्ठा। का बात
 संभव बा कलसे, उ समयम अपन्हेह ख्रीष्टीयन कैक दाबी कर्ना शक्तिशाली
 यहूदीहुँक रलह, तर हुँक जीए पर्ना तरीकाले जीवन नैजीएँट्, ओ उहओसें
 झग्रा करबेर कबुकाल हत्या फे होजाइन। ज्या हुइलसे फे, आपन स्वार्थी
 चाहना पूरा करक लाग आनक हत्या कैडर्ना काम ठीक नैहो। कुई फे, खासकैक
 ख्रीष्टीयनहुँक, असिन घिनलग्टिक काम कर नैपरट (प्रस्थान २०:१३)।

† ४:५ यिहाँ यी पदक अर्थ दुइ किसिमले लागसेकी: या त परमेश्वर हमारम
 डाहा कर्ना आत्मा डारदेरख्ल, या त परमेश्वर हमार आत्मा पाइक लाग
 एकदम डाही बाटा। यी अनुवादम पैल्हक अर्थह लेगैल् बा। १-३ पदम याकूब
 मनै औरजन्हकठे रहल असल-असल चिज देखत त उह चिज पैना चाहना कठ

कैक दुह सौँचो का? ६वास्तवम परमेश्वर हम्र आपन खराब चाहनह जितसेकी कैक हमन धेर दया कर्ठ, जसिन कि वचनम लिखल बा, "परमेश्वर घमण्डी मनैन्हक विरोध कर्ठ, तर नम्र मनैन दया कर्ठ।"

७उहओसें विनम्र होक परमेश्वरक अधीनम रहो। दुँहन पापम फँसाइ खोज्ना शैतानक* प्रयासक विरोध करो, त उ दुँहन छोरक भागी।# ८परमेश्वरसे लगघक सम्बन्ध जोरो, त उहाँ फे दुँहनसे लगघक सम्बन्ध जोरहीं। दुह पाप कर्टीरना मनै, आपन जिवन सफा करक लाग खराब काम कर छोरदेओ। दुह दुइ मनक मनै, खराब विचार छोरक आपन मन परमेश्वरकम केल लगाओ। ९आपन पापी जीवनक बारेम सौँचक शोक करो ओ रोओ! दुह खुसी हुइल् ओ हाँसल से त, दुखी हुइपर्ठा ओ रुइपर्ठा! १०परमेश्वर हेटींबाट, उहओसें नम्र होओ, तब उहाँ दुँहन उठुइयाबाट।†

कैक कठ। असिन चाहनाले हुँकन्हक बीचम लराई ओ झग्रा अइठन। असिन बिह्न मुना चाहनह जितक लाग हमन परमेश्वरक दया आवश्यक पठा।

* ४:७ **शैतान:** शैतान भूतन्हक रज्वा हो। थप जानकारीक लाग "शैतान" शब्दक अर्थ हेरी।

४:७ लूका ४:१-१३

† ४:१० **उहाँ दुँहन उठुइयाबाट:** यिहाँ याकूब खासकैक का कहट कलसे, परमेश्वर नम्र मनैन भौतिक हिसाबले केल उठुइया नैहुइट, तर उहाँ हमन धेर चिजक आशिष देहुइयाबाट, जौन आशिष सड्डभर आँखिले द्याख नैसेकजाइट। याकूब १:९ म रहल फुटनोट हेरी।

११हेरो भैयौ, ख्रीष्टीयन डाडु-भैयन्हक विरोधम खराब बात जिन बट्वाओ। यदि बटोइठो ओ हुँकन दोषी ठहैठो कलसे, दुह औरजहन प्रेम कर कना व्यवस्थक विरोधम खराब बात बटोइठो ओ व्यवस्थह दोषी ठहैठो। यदि दुह व्यवस्थह दोषी ठहैठो कलसे, दुह व्यवस्थम लिखलअनुसार चलुइयन नैहुइठो, तर दुह अपन्हेह परमेश्वरक व्यवस्थसे धेर अधिकार रहल न्यायधिशअस स्वाँचटो। १२तर वास्तवम व्यवस्था* देहुइया परमेश्वरकठे केल न्याय कर्ना अधिकार बाटन। मनैन्हक प्राण बँचैना या नाश कर्ना शक्ति उहाँकठे केल बाटन। उहओसे का अधिकारले दुह औरजहन दोषी ठहैठो?

१३दुह "आज या काल हम्र फलाना शहरम जैबी, ओ उहाँ वर्ष दिन व्यापार कर्बी, ओ धन कमैबी" कैक घमण्ड करुइयन यिहाँ सुनो। १४दुह त काल हुइना बात फे नैजन्टो। दुन्हक जीन्दगी का हो जे? दुन्हक जीन्दगी त एककघरी देखपर्ना ओ बिलाजैना वाफअस केल त हो। १५बेनसे दुह असिक कहपर्ना हो, "यदि परमेश्वर चहहीं कलसे, हम्र बँच्लरबी ओ असिन-ओसिन कर्बी।" १६तर दुह त घमण्डी होक आपन बनाइल योजनम खूब धाक लगैठो। असिक धाक लगैना खराब हो।

१७उहओसे यी बात जन्लरहो: यदि कुई जानजान्क फे मजा काम नैकरट् कलसे, उ पाप कठा।

* ४:१२ **व्यवस्था:** थप जानकारीक लाग "व्यवस्था" शब्दक अर्थ हेरी।

परमेश्वर थिचोमिचो कर्ना धनी मनैन चेतावनी देठ

५ †धनी मनै* सुन पर्ना म्वारठे एक बात बा। हुँक
 विलाप कै-कै रुइपठा, काकरकि हुँकन्हक जीवनम धेर
 दुखकष्ट अइटीबाटन। ‡हुँकन्हक धनसम्पत्ति काम
 नैलग्ना होजैहीन, लुगाफाटा लुगा खैना कीरा† खाडरहीन,
 ‡ओ चाँदी ओ स्वानम फे कस लाग्क बेकार होजैहीन। उह
 कस जो हुँकन्हक ल्वाभक दोष देखाइक लाग प्रमाणक रुपम
 प्रयोग हुई। आगी मनैन जराइअस, हुँकन्हक ल्वाभ हुँकन
 बिनाश करहीन। तर हुँक परमेश्वर न्याय कर्ना समय आइ-
 आइ रहलम फे धन-सम्पत्ति कुहेइटीबाट। †हेरो! हुँकन्हक
 खेत्वक बालीनाली सहेरदेना मनैन हुँक ज्याला नैदेलहुइटा।
 ज्याला नैपैलकओसे हुँक परमेश्वरसे जोरसे पुकारा कर्टीबाट।
 सर्वशक्तिमान परमेश्वर हुँकन्हक पुकारा सुनरख्ल। †धनी मनै
 जुन सुख-विलासक जीवनम आपन सब स्वार्थी चाहना पूरा
 कर्टीबाट। परमेश्वर बिनाश कर्ना बात बिना जन्ल, हुँक
 असिन काम कर्टीबाट।‡ †हुँकन्हक विरोध फे नैकर्ना निर्दोष
 मनैन हुँक दोषी ठहाइ ओ मुवाइ लगारख्ल।

* ५:१ यिहाँ बात बट्वागैल् धनी मनै विश्वासीहुँक नैहुइट जसिन देखपठा।
 याकूब उह धनी मनैन्हक थिचोमिचोम परल गरीब विश्वासीन उत्साह देहक
 लाग सम्भवतः हुँकन्हक कबु नैओरैना अन्तिम दण्डक बारेम बटोइठा।

† ५:२ **लुगा खैना कीरा**: ग्रीक भाषक स्रोतमसे यी वाक्यांशक शाब्दिक
 अनुवाद कर्लसे, 'लुगा खैना जोगनी' हुइठा।

‡ ५:५ ग्रीक भाषक स्रोतमसे यी पदक शाब्दिक अनुवाद कर्लसे, असिन हुइठा:
 'दुह यी पृथ्वीक मोजमजा ओ सुख-विलासम आपन जीवन बितैटीआइठो;
 कट्वापैना दिनिक लाग दुह आपन मन ठुल्हारख्लो।' याकर अर्थ हो: जसहँक

दुखकष्टम धैर्य धारण करपर्ठा

७उहओसे हेरो भैयौ, प्रभु येशू ख्रीष्ट फेदोस्र नैआइट्सम, धैर्य धारण करो। एक बात विचार करो: खेतीकिसान करुइयन आवश्यक पानी नैआइट्सम, धैर्य कैक बहुमूल्य बालीनाली उब्जाइक लाग अश्या लग्लरठा* ८ओसहँक, दुह फे धैर्य करो, ओ साहस करो, काकरकि ठीक न्याय करुइया प्रभु येशू ख्रीष्ट जब फे आइसेकठ। ९एक-औरजन्हक विरोधम गनगन जिन करो, भैयौ, नकि दुह फे दोषी ठहाजैबो। हेरो, ठीक न्याय करुइया व्यक्ति इवारीटर पुगरल।

१०हेरो भैयौ, बरा-बरा दुखकष्ट फे धैर्य धारण कैक सहना परमेश्वरक नाउँम उहाँक वचन बोलुइयन दुह पालन करपर्ना उदाहरणक रुपम विचार करो। ११दुखकष्ट सहना मनैन परमेश्वर आशिष देठ कना बात हम्र मन्लबाटी। अय्यूब दुखकष्ट सहलक, ओ परमेश्वर हुँकहीन धेर दया ओ कृपा देखैलक बात दुह सुनरख्लो। यी बात हुँकाहार जीवनम दुखकष्ट औरैलन त स्पष्ट देखपर्लन।

१२आखिरम, हेरो भैयौ, स्वर्गम या पृथ्वीम रना केकरो नाउँम किन्या जिन खैहो, या कौनो और तरिकाले फे किन्या

पश अप्न कट्वापैना बात बिना जन्ल धेर घाँस, दानापानी खाक ठुलहैठ, ओसहँक धनी मनै फे परमेश्वरसे कब्बु नैओरैना अन्तिम दण्ड पैना बात बिना जन्ल सुख-विलासम आपन जीवन बितैटीबाटा।

* ५:७ **आवश्यक पानी:** ग्रीक भाषक स्रोतमसे यी वाक्यांशक शाब्दिक अनुवाद कर्लसे, असिन हुइठा: 'आघक ओ पाछक वर्षा'।

जिन खैहो।* बेनसे दुह "हो" कलसे, "हो", ओ "नैहो" कलसे, "नैहो" कैदेहो, नकि दुह परमेश्वरक न्यायम पर्बो।

परमेश्वरसे पुकारा कर्लसे, † शक्तिशाली रुपले काम हुइठा

‡ दुहमध्येम यदि कुई दुखकष्ट भ्वागटा कलसे, उ परमेश्वरसे सहायता माङ्गक लाग पुकारा करपठा। दुहमध्येम यदि कुई आनन्दित बा कलसे, उ भजन गैटी परमेश्वरक आराधना करपठा। § दुहमध्येम यदि कुई बेराम बा कलसे, उ मण्डलीक अगुवन‡ बलाइपठा, ओ हुँक आक प्रभुक कृपा हुइल सँकेतक रुपम वाकरम त्याल लगादेटी‡ वाकर लाग परमेश्वरसे पुकारा कैदिहपठा। ¶ यदि "यी

* ५:१२ याकूबक यी चिठी लिखल समयम मनै विभिन्न तरिकाले किय्या खाईट्। कबुकाल हुँक परमेश्वरक नाउँ पार्क असिक किय्या खाईट्, "यदि म्वार बात गल्ती हुई कलसे, स्वर्गक परमेश्वर महीह दण्ड देहीं"। कबुकाल हुँक पृथ्वीमक केकरो नाउँ पार्क असिक किय्या खाईट्, "यदि म्वार बात गल्ती हुई कलसे, पृथ्वीम शासन करइया महीह दण्ड देहीं"। ओ कबुकाल जुन हुँक यरूशलेम जसिन कौनो शहरक नाउँ पार्क किय्या खाईट्। याकूबक कहल यी बात, मत्ती ५:३४-३५ म येशूक कहल बातसे तुलना करी।

† ५:१३ **परमेश्वरसे पुकारा कर्ना:** थप जानकारीक लाग "परमेश्वरसे पुकारा कर्ना" शब्दक अर्थ हेरी।

‡ ५:१४ **मण्डलीक अगुवन:** थप जानकारीक लाग "मण्डलीक अगुवन" शब्दक अर्थ हेरी।

§ ५:१४ **त्याल लगैना:** प्रार्थना करबेर त्याल लगादेना काम चोखैना संकेत रह। थप जानकारीक लाग "त्याल लगैना" शब्दक अर्थ हेरी।

बेरम्हेह प्रभु चोखैहीं" कना विश्वासले प्रभुसे पुकारा कर्ना हो कलसे, प्रभु ओहीह चोखैहीं। उ मनैया पाप कैराखल कलसे, परमेश्वर ओहीह क्षमा कैदेहीं। १६उहओसें यदि दुह चोखाइ चहठो कलसे, दुह एक-औरजन्हक आघ आपन-आपन करल पाप काम स्वीकार करपठा,* ओ एक-औरजन्हक लाग परमेश्वरसे पुकारा कैदेहपठा। यदि परमेश्वरक इच्छा अनुसारक जीवन जीना मनै पुकारा कर्ल कलसे, परमेश्वर शक्तिशाली ओ प्रभावशाली तरीकाले काम कठ। उ मनैया हालसालऽ पाप कैराखल कलसे, परमेश्वर ओहीह क्षमा कैदेहीं।

१७परमेश्वरक वचन बोलुइया एलिया† हमारअस मनै त रलह। पानी जिन आए कैक उ परमेश्वरसे पुकारा कर्ल त, यहूदीन्हक देशम तीन वर्ष छ मैन्हासम, एक बुन्दा पानी नैआइल।# १८पाछ पानी आए कैक उ परमेश्वरसे पुकारा कर्ल त, पानी आइल ओ बालीनाली मजासे फरल।

* ५:१६ **आपन-आपन करल पाप काम स्वीकार करपठा:** याकर मतलब मनैया आपन जीन्दगीभर करल पाप स्वीकार करपठा कहल नैहो, तर हालसालऽ करल पाप स्वीकार करपठा कहल हो, काजेकलसे उ पापक कारण मनैया बेराम परल हुइसेकठा।

† ५:१७ **एलिया:** एलिया अघट्टे परमेश्वरक वचन ब्वालैट्। थप जानकारीक लाग "एलिया" शब्दक अर्थ हेरी।

५:१७ १ राजा १७:१; १८:४१-४६

टँहर्कल विश्वासीह मजासे सम्झाबुझा पारपठा

१९हेरो भैयौ, टुह्ममध्येम यदि कुई पैल्ह परमेश्वरक वचन अनुसार जीवन जीए, तर आब नैजीएट्, ओ टुह्म ओहीह फेदोस्त्र परमेश्वरकठे आनसेक्लो कलसे, २०टुह्म यी बात महसुस करपठा: टुह्म एकठो मनैयह मृत्युमसे बाँचक लाग ओ सब पाप क्षमा पाइक लाग सहायता कैरख्लो।

शब्दक अर्थ

(नोट: ठूल अक्षरम लिखौल् थारु शब्दक पाछ कोष्ठम नेपाली शब्द फे देगैल्बा।)

अञ्जीर

अञ्जीर एक जातक रुखवा हो। याकर फारह फे अञ्जीर कठा उ फारा एकदम मीठ रठा। (याकूब ३:१२ म रहल चित्र हेरी)।

अगुवा

लौव नियमम, “अगुवा” शब्द तीन फरक फरक तरीकाले प्रयोग हुइल्बा।

यहूदी धर्मक अगुवन (अगुवा / धर्म-गुरु)

खुशिक खबरम, “अगुवा” शब्द यहूदी धर्मक अगुवन जनैठा (मर्कूस ७:३; ८:३१; ११:२३)। इस्राएल देशक इतिहास ह्यारबेर, अगुवन शासकअस अधिकार कर्लरलह कना बात देखपठा (व्यवस्था ३१:२८), ओ हुँक समाजम न्यायनिसाफ करुइयन फे रलह (व्यवस्था १६:१८; १९:१२)। येशूक समयम हुँक फे येशूह धर्मक बातम फँसाइक लाग मुख्य पुजेहोनसे ओ धर्मगुरुनसे मिल्लक सँगसँग काम करँट। आखिरीम येशूह क्रूसम मुवैनाम हुँकन्हक फे हाँठ रलहन (मर्कूस ८:३१; १४:४३-६५; १५:१-१५)।

ख्रीष्टीयन मण्डलीक अगुवन (एल्डर):

प्रेरित ११-१२ म, ओ ख्रीष्टीयन मण्डलीन्हक लाग पावल ओ औरजन्हक लिखल चिठीम, “अगुवा” शब्द स्थानीय मण्डलीम नियुक्त हुइल्अगुवन जनैठा। हुँकन्हक नियुक्ति ओ आवश्यक चारित्रिक गुण ओ व्यवहार सम्बन्धम थप जानकारीक लाग प्रेरित १४:२३; १ तिमोथी ३:१-१७; ४:१४; ५:१७-२२; तीतस १:५-९; याकूब ५:१४; १ पत्रुस ५:१-४ हेरी।

प्रकाशक किताबम दर्शनमक अगुवन (एल्डर):

प्रकाश कना बाइबलक किताबम, ४-५ अध्यायम, येशूक चेला, यूहन्ना, दर्शनम चौबिस जन “अगुवन” स्वर्गम परमेश्वरह आराधना करट्देख्ठ। हुँकन सम्भवतः परमेश्वरक जम्मा हुइल्सारा मनैन्हक संकेतक रुपम बुझपठा।

अब्राहाम

अब्राहाम येशू ख्रीष्ट जर्मनासे लगभग २००० वर्ष आघ ऊर कना ठाउँम (आजकाल्हिक इराकम) जर्मलह। परमेश्वर अब्राहामसे बाचा कर्ल, “मै टुँहार सन्तानन् एकठो जाति बनैनेबाटुँ, हुँक बहुत धेर हुइनेबाट। टुँहिनसे सारा संसारक मनै आशिष पैनेबाट (उत्पत्ती १२:२-३)।” परमेश्वरक करल बाचम अब्राहाम विश्वास कर्ल। तबदोस्र अब्राहाम इसहाकह जर्मल। इसहाक याकूबह जर्मल। याकूब बार भाइ छ्रावन जर्मल। उह बार भैयौँन्हक सन्तानन् यहूदी जाति या इस्राएली कैगिल।

दाउद राजा ओ येशू ख्रीष्ट फे उह सन्तानमसे जर्मलह।
यहूदीहुँक अब्राहामक शारीरिक सन्तान हुइल कलसे, येशू
ख्रीष्टकम विश्वास कर्ना मनै अब्राहामक विश्वासक सन्तान
हुइठ (रोमी ४:९-१७; गलाती ३:६)।

आज्ञापालन

साधारण हिसाबले आज्ञापालन कलक औरजन्हक कहल
मन्ना हो। बाइबलम, आज्ञापालन कलसे, खास कैक
परमेश्वरक कहल मन्ना बातक अर्थ लग्ठा। परमेश्वरक कहल
बात मन्ना कलक धर्मकर्म कर्ना केल नैहो, या रीत पूरा कर्ना
केल नैहो, तर बाइबलम लिखल अनुसार चलना हो (मत्ती
७:२१; मर्कूस ७:९-१३)। परमेश्वरक आज्ञापालन कर्लसे,
जीवनम आशिष अइना, ओ आज्ञापालन नैकर्लसे, सराप पर्ना
बात बाइबलम लिखल बा (व्यवस्था ८, २८)।

आज्ञापालन कर्ना कलक ख्रीष्टीयनहुँक मुक्ति पाइक लाग
कर्ना काम निहो, तर मुक्ति पासेक्लक कारण, हुँक आभारी
होक परमेश्वरक आज्ञापालन कर्ठ (यूहन्ना १४:२१-२३ १
यूहन्ना ४:१९)। आज्ञापालन कर्ना कलक विश्वासह
व्यवहारम देखैना काम फे हो (याकूब २:१४-२६)।
परमेश्वरक आज्ञापालन कर्ना काममध्ये, हम्म कर पर्ना एकठो
सबसे महत्वपूर्ण काम कलक येशूकम विश्वास कर्ना हो (१
यूहन्ना ३:२१-२४)।

इसाएली

हेरी “यहूदी”।

एलिया

एलिया अघट्टे इस्राएल देशम परमेश्वरक वचन बोलुइया रलह। उ समयम आहाब राजा राज्य करँट। हुँकाहार रानीक नाउँ ईजेबेल रलहन। आहाब परमेश्वरद्वारा इस्राएल देशम एकठो खराब राजा मानगैल, काजेकलसे उ मूर्तिपूजा कर्ल (१ राजा १६:२९-३४), जौन मूर्तिपूजा परमेश्वरह एकदम रिस लगना बात रलहन (प्रस्थान २०:४-६; व्यवस्था ३२:१५-२१)। जब आहाब ईजेबेलह भ्वाज कर्ल, जे यहूदी नैरलही, उ इस्राएलीन ईजेबेलक मूर्तिक बारेम पूजा करक लाग परिचय करैल, ओ अवस्था झन खराब हुइल। परमेश्वर मनैन्हक मन आपनओर घुमाइक लाग उहाँ हुँक पुज्टीरहल मूर्तिसे धेर महान हुइट कना बात देखैना उद्देश्यले एलियह एकदम नाटकीय हिसाबले प्रयोग कर्ल (१ राजा १८:१६-४०)। उदाहरणक लाग एकचो एलिया पानी जिन आए कैक परमेश्वरसे पुकारा कर्ल, तब यहूदीन्हक देशम तीन वर्ष छ मैन्हासम एक बुन्दा पानी नैआइल (१ राजा १७:१; याकूब ५:१:१७)। पाछ उ पानी आए कैक परमेश्वरसे पुकारा कर्ल त, पानी आइल (१ राजा १८:४१-४६; याकूब ५:१:१८), ओ बालीनाली मजासे फरल।

खुशिक खबर (सुसमाचार)

साधारण हिसाबले खुशिक खबर कलक मजा खबर हो। तर बाइबलम, खुशिक खबर कलसे, एकठो विशेष अर्थ लग्ठा। धेर वर्ष आघ, परमेश्वर इस्राएलीन मुक्ति देना बाचा कैरखलह (यशैया ९:१-७)। परमेश्वर उ बाचा येशू ख्रीष्टकम

पूरा कर्ल ओ सक्कुजन्हक लाग मुक्तिक इवार खोलदेल
(कलस्सी १:१३)।

खुशिक खबर कलक यहि हो कि येशू ख्रीष्ट सारा संसारह
मुक्ति देना परमेश्वर हुइट, ओ उहाँ मनैन पापमसे मुक्ति
दिहक लाग यी संसारम अइल (१ पत्रुस २:२४; रोमी
६:२३)। पापमसे मुक्ति पाइक लाग, मनै येशू ख्रीष्टकम
विश्वास कर्ना बाहेक और कुछ कर नैपरट् (यूहन्ना १:१२;
३:१६)। मनैन्हक लाग सबसे खुशिक खबर यहि हो।

जैतुन

जैतुन एक जातक रुखवा हो। याकर फारह फे जैतुन कठा
यहूदीहुँक जैतुनिक त्याल प्यारँट्ओ खैना त्यालक रुपम प्रयोग
करँट्। अत्र केल नैहोक, हुँक कपारीम घँसक लाग, दिया
बारक लाग, ओ और धेर कामक लाग फे उ त्याल प्रयोग
करँट्। हुँकन्हक जीवनम उ त्यालक ओ रुखवोक धेर महत्व
रलहन ओ बाइबलम याकर बारेम धेर ठाउँम उल्लेख
कैगैल्बा (रोमी ११:१७, २४; याकूब ३:१२; प्रकाश ११:४)।
यरूशलेम शहरक लगघ एकठो पर्वत्वा बा, उ पर्वत्तोम
जैतुनिक रुखवा एकदम धेर बा। उहओसे ओहीह जैतुनिक
पर्वत्वा फे कठ (मत्ती २१:१; मर्कूस ११:१; १३:३; प्रेरित
१:१२)। (याकूब ३:१२ म रहल चित्र हेरी)।

ठीक ठहर्ना / ठीक ठहैना

बाइबलम “ठीक ठहर्ना” बातह दुइ फरक-फरक अर्थम
प्रयोग कैगैल्बा। सबसे पैल्ह, एकठो अर्थ का बा कलसे,
परमेश्वरक इच्छा ओ आज्ञा अनुसार जीवन जीना मनैन

परमेश्वर ओ मनै ठीक ठहैठ। यी अर्थ याकूबक किताबम मुख्य प्रयोग हुइलदेखपठा (याकूब १:२०; २:२३; ३:१९)। “ठीक ठहर्ना” फरक अर्थम फे प्रयोग हुइलबा। उ कसिन हो कलसे, ख्रीष्टकूम विश्वास कैक मुक्ति पाइल मनैन परमेश्वर ठीक ठहैठ। बाइबलम लिखल बा कि मनै परमेश्वरद्वारा ठीक ठहाजाइक लाग, ओ स्वर्ग जाइक लाग, असल काम कर नैसेक्ट (यशैया ६४:४-९; रोमी ३:२०; एफिसी २:८-१०)। तर परमेश्वर येशूह हमार पापक बलि हुइक लाग, ओ हम्र स्वर्गम उहाँकसँग रह पैना एकठो डगर बनाइक लाग, पठैल (गलाती ३:१३; हिब्रू ९:११-१६, २६-२८; १९: ११-१४; १पत्रुस २:२४ ३:१८)। जब हम्र ख्रीष्टकूम भरोसा कठी, जब परमेश्वर हमन देखठ, यी कसिन हो कलसे, उहाँ ख्रीष्टक सिद्ध ओ पाप नैरहल जीवन जसिन देखठ ओ हम्र दोषी नैठहाजैठी या ठीक ठहाजैठी (रोमी ३:२१-२६; २ कोरिन्थी ५:२१; हिब्रू १०:१०)।

त्याल लगैना (अभिषेक गर्नु)

साधारण अर्थम “त्याल लगैना” कलक जीउम त्याल घँस्ना हो। तर बाइबलम, त्याल लगैना कलक अत्र केल नैहोक, विशेष समारोहम कौनो मनैयकम, जस्त पुजेहोकम (प्रस्थान ३०:३०; ४०:१२-१५), या रज्जोकम (२ राजा ९:१-६), वास अइना चिज मिलाइल त्याल खन्हूयैना चलन रह।

खास कैक किहुह पुजेहूवा या रज्जा पद ग्रहण कराइबेर, सार्वजनिक रुपम त्याल खन्हूयाजाए। असिक त्याल खन्हूयागैल् मनैया परमेश्वरक लाग अल्गागैल् हो कना

बुझजाए, ओ हुँक आपन पदभार मजासे चलाइक लाग परमेश्वरसे अधिकार पाइल मनै मानजाइँट।

अत्र केल नैहोक, और कामम फे त्यालक प्रयोग ह्वाए।
जसिन कि:

- रोग्याबेरम्हेन चोखाइक लाग त्याल लगाजाए (मर्कूस ६:१३; याकूब ५:१४-१५)।
- मुवल मनैन गन्यम ठर्नासे आघ मूर्दकम बास अइना चिज या त्याल खन्ह्यैना यहूदी चलन रह (मर्कूस १६:१)। हेरी टरक नोट।
- मन्दिरम काम लगाजैना वस्तुम त्याल खन्ह्याजाए। त्याल खन्ह्यागैल् वस्तु परमेश्वरक कामक लाग अल्गागैल् हो कना बुझजाए (प्रस्थान ३०:२२-२९; ४०:९-११)।

मर्कूस १४:८ म, एकठो जन्नी मनैया येशूक ग्वारम वास अइना चिज खन्ह्याइल बात लिखल बा। उहाँह धेर मानसम्मान दिहक लाग, उ जन्नी येशूकम बास अइना चिज खन्ह्यैलही (मर्कूस १६:१ म रहल फुटनोट हेरी)। तर येशू उ जन्नीक करल कामह मूर्दकम वास अइना चिज या त्याल खन्ह्यैना चलनक अर्थ लगैल।

नरक

बाइबलक हिसाबले, मनै मुलसे, कि त नरकम जैठ, कि त स्वर्गम जैठ। नरक कलक येशूकम विश्वास नैकरुयन, ओ शैतान ओ वाकर पाछ लगुइयन दण्ड देना ठाउँ हो। उ सह नैसेकजैना दुःख भोगना ठाउँ हो, ओ उहाँ गैल् मनै कबु फे

उम्कसेकुइया नैहुइट (मत्ती १८:८; २५:४१-४६; मर्कूस ९:४२-४८; यहूदा ६-७; प्रकाश २०:१०)।

परमेश्वर

परमेश्वर आत्मा हुइलकओसे, उहाँह द्याख नैसेक्जाइट (रोमी १:२०; कलस्सी १:१५; १ तिमोथी १:१७; ६:१५-१६)। तर फे बाइबलम का लिखल बा कलसे, उहाँ बोल्ठ (उत्पत्ती ३:८-१९; ९:१६; मर्कूस १:११), सुन्ठ (अय्यूब ३४:२८; भजनसंग्रह ११६:१), देख्ठ (भजनसंग्रह ३३:१३-१४; हितोपदेश ५:२१), रिसैठ (प्रस्थान २२:२४; रोमी १:१८, प्रेम कर्ठ (यूहन्ना ३:१६), ओ सोगैठ (हिब्रू ४:१५-१६)। परमेश्वर एक्क समयम सब ठाउँम बाट (भजनसंग्रह १३९:७-१०; यर्मिया २३:२३-२४), उहाँ सब चिज जन्ठ (भजनसंग्रह १३९:१-४; दानियल २:२०-२२), उहाँ सक्कुनसे शक्तिशाली बाट (अय्यूब ४२:२; लूका १:३७), उहाँ सड्डभर पलबाट ओ पलरहुइयाबाट (१ तिमोथी १:१७; प्रकाश ११:१७; १५:७), ओ उहाँ कबु फे पाप नैकर्ल ओ कबु फे पाप करुइया नैहुइट (याकूब १:१३ १; पत्रुस १:१:१५)।

उहाँ स्वर्ग, पृथ्वी ओ उहिम रहल सबचिज सृष्टि कर्ल (यर्मिया ५१:१५; हिब्रू २:१०)। उहाँ मनैन्हक भलो चह्ठ (यर्मिया २९:११)। उहओसे परमेश्वर मनैन पापमसे मुक्ति देना योजना बनाक उह अनुसार काम कर्ल। येशू ख्रीष्टकम

विश्वास कर्लसे, मुक्ति पैना बात बाइबलम लिखल बा (रोमी ५:१०; हिब्रू २:१४-१५)।

परमेश्वर तीनठो व्यक्तित्वम बाट: बाबा परमेश्वर, छावा परमेश्वर, ओ आत्मा परमेश्वर (मर्कूस १:१०-११)। ख्रीष्टीयन इतिहासम यहीह त्रिएक परमेश्वर कैगिल् बा। हम्र बाइबलम का देख्ठी कलसे, हुइना त परमेश्वर तीनठो व्यक्तित्वम बाट, तर उहाँ एक्कठो परमेश्वर हुइत, तीनठो परमेश्वर नैहुइत (व्यवस्था ६:४)।

परमेश्वरक आत्मा (पवित्र आत्मा)

परमेश्वरक आत्मा कलक परमेश्वरऽ हुइत (प्रेरित ५:३-४; २ कोरिन्थी ३:१७-१८)। येशू ख्रीष्टकम विश्वास कर्ना मनैन्हकम परमेश्वरक आत्मा बास कर्ठ (रोमी ५:५; ८:९)। परमेश्वरक आत्मक सहायताले, ख्रीष्टीयनहुँक येशूह परमेश्वरक छावा कैक प्रचार कर्ठ (प्रेरित १:८), बाइबलक वचन बुइना शक्ति पैठ (यूहन्ना १६:१३), सेवा कर्ना अगुवाइ पैठ, आत्मक फारा फराइ सेकठ, पापम नैफँस्ट, ओ लौव जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, परमेश्वरक आत्मा ख्रीष्टीयनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।

परमेश्वरक वचन

लौव नियमम प्रयोग हुइल वाक्यांश “परमेश्वरक वचन” या त पुरान नियमक एक खण्ड या सब किताबह जनैठा। हुँकन्हक लिखाइमसे हम्र का द्याख सेकठी कलसे, लौव नियमक लेखकहुँक धेर ठाउँम पुरान नियमक उनन्वालीसठो किताबक लेखकहुँकन्हक लिखल बात परमेश्वरक वचन रहल बात विश्वास कैरख्ल। उदाहरणक लाग २ तिमोथी ३:१६ म पावल परमेश्वरक प्रेरणासे आइल सारा वचन शिक्षा देहक लाग, अर्ती देहक लाग, गल्ती सुधारक लाग, ओ असल जीवनक तालिम देहक लाग, धेर काम लग्ना बा कैक लिखरख्ल। २ पत्रुस १:२०-२१ म पत्रुस परमेश्वरक वचनम उहाँक वचन बोलुइयन्हक कहल बात मनै आपन हिसाबले बयान कैक नैहुइट्, काकरकि परमेश्वरक वचन बोलुइयन्हक कहल बात मनैन्हक इच्छा अनुसार आइल नैहो, तर परमेश्वरक आत्मक प्रेरणा पाइल मनै उहाँक वचन बोल्लह कैक लिखरख्ल।

ओसहँक आजकाल ख्रीष्टीयनहुँक पुरान नियमक सब किताब ओ लौव नियमक पूरा सत्ताइसठो किताबह परमेश्वरक वचन मन्ठ। पुरान नियमक ओ लौव नियमक छैसट्ठीठो किताब मिल्ल बाइबल बनल बा। उ बाइबल परमेश्वरक बारेम उहाँक प्रकाश ओ हमार लाग उहाँक इच्छा हो।

परमेश्वरक राज्य (परमेश्वरको राज्य)

परमेश्वरक राज्य संसारक राज्यअस नैहो। उहाँक राज्यम भौगोलिक सिमा नैरहट्, राजनैतिक पार्टी नैरहट्, वर्गीय ओ जातिय भेदभाव नैरहट्। परमेश्वरक राज्य कलक परमेश्वरक

शासन हो। उ शासनम परमेश्वर राजक रूपम शासन कर्ठ,
तर परमेश्वर निरङ्कुश शासन नैचलैट। उ शासनम अन्याय,
अत्याचार, शोषण, दमन, या भ्रष्टाचार कुछु नैहो।

उहाँक शासन त धार्मिक, न्यायिक, ओ पवित्र बाटन। उहाँ
प्रेमम, शान्तिम, मिलापम, एकताम राज्य कर्ठ (भजनसंग्रह
१४५; यशैया ९:१-७)। उ राज्य मनैन्हक मनम स्थापित
हुइना राज्य हो। मनम परमेश्वरक राज्य स्थापित हुइल् मनै
आपन जीवनम परमेश्वरह शासन कर देठ।

परमेश्वरक वचन बोलुइया (अगमवक्ता)

परमेश्वरक वचन बोलुइयन कलक ओसिन मनै रलह, जे
परमेश्वरक इच्छा ओ योजना मनैन सिखाइँट। बाइबलम,
मोशा, यशैया, यर्मिया, एलिया, बप्तिस्मा देहुइया यूहन्ना
ओ और जन परमेश्वरक वचन बोलुइयन मानजाइँट। हुइना
त, हुँक मनै रलह, तर जब हुँक ब्वालँट, तब परमेश्वरक
ब्वालल्अस ह्वाए। हुँक मनैन सन्देश दिहबेर, धेरचो असिक
कहँट 'परमेश्वर यी बात कहट' (यशैया १०:२४; यर्मिया
३३:१-२६; इजकिएल १२:१-२८)।

कबुकाल परमेश्वरक वचन बोलुइयन पाछ हुइना बात
आघहँ जनादिहँट। धेर जसिन हुँक मनैन्हक पाप काम
औँल्यादिहँट ओ जीवनम सुख, शान्ति, ओ आनन्द पाइक
लाग, आपन-आपन पापी मन घुमाक परमेश्वरकठे जाइपनी
बात फे घरी-घरी मनैन कहँट (मर्कूस १:२-५)।

परमेश्वरकसँग सड्डभर रहपैना जीवन (अनन्त जीवन)

परमेश्वरकसँग सड्डभर रहपैना कलक यी जुनीम येशू ख्रीष्टक सम्बन्धम रहक जीना, ओ मुलसे, स्वर्गम जैना जीवन हो (यूहन्ना १७:३-२६; १ यूहन्ना २:२४-२५)। मनै येशूकम विश्वास कर्ल कलसे, हुँकन्हकम परमेश्वरकसँग सड्डभर रहपैना जीवन शुरु हुइठन (यूहन्ना ३:१६), तर यी जीवनक पूर्णता भर हुँक मुलसे केल, पैठ (१ कोरिन्थी १५:५२-५४)। हुँक पापक क्षमा पैठ ओ परमेश्वरक सन्तान हुइठ (यूहन्ना १:१२; १ यूहन्ना ३:१)।

परमेश्वरसे पुकारा कर्ना (प्रार्थना कर्ना)

परमेश्वरसे पुकारा कर्ना कलक साधारण अर्थम ख्रीष्टीयनहुँक परमेश्वरसे बातचित कर्ना हो। अत्र केल नैहोक, परमेश्वरसे पुकारा कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे पुकारा कर्ना फे हो (दानियल ९:३-२३; १ यूहन्ना १:९)। परमेश्वरसे आपन घटिकमीक माग कर्ना फे हो (याकूब १:५; फिलिप्पी ४:६-८)।

यदि हम्र परमेश्वरक आज्ञाकारी जीवन जीलबाटी कलसे, परमेश्वर हमार करल पुकारा सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२९)। परमेश्वरसे पुकारा कर्ना काम उहाँसे सम्बन्ध बहैना एकठो मजा तरिका

फे हो। परमेश्वरसे पुकारा कर्लकओसे, उहाँकम विश्वास करल मनैन्हक जीवनम भारी-भारी शक्तिक काम हुइल बाटन (याकूब ५:१३-१८)। उहमार परमेश्वरसे पुकारा कर्ना ख्रीष्टयन जीवनक एकठो मुख्य भाग हो।

पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सक्कु खराब विचार (जस्त: ल्वाभ कर्ना, हेल्हा कर्ना, बिह्ल मुना, घमण्डी हुइना, ओ मूर्ख हुइना), ओ सक्कु खराब काम (जस्त: बेश्या काम कर्ना, चोर्ना, हत्या कर्ना, झग्रा कर्ना, लभर्ना, ठगना, बदला लेना) हो (मर्कूस ७:२१-२२; गलाती ५:१९-२१)।

पाप परमेश्वरक विरोधम हुइना काम हो, ओ सबसे छिटिमिटि पाप काम फे परमेश्वरक नजरम नैमजा काम हो। पाप मनैन परमेश्वरसे अल्लौरठा (रोमी ६:२३)। पाप कर्लक कारण मनैन्हक जीवनम डर, शरम, ओ दुःख आइल (उत्पत्ती ३)। अत्र केल नैहोक, मनै मुव पर्ना फे हुइल् (रोमी ६:२३)।

पाप साधारण बात नै हो। बास्तवम मनै पापक बन्धनम परल बाट। पापक यी बन्धनमसे मनै अपन्हे मुक्ति पाइ नैसेक्ट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा, ओ येशूकम विश्वास कैक परमेश्वरकठे आइपर्ठा (मर्कूस १:४; यूहन्ना ३:१६)।

पापमसे मुक्ति पैना कलक पापक दण्डसे बचना हो। हुइना त, येशूकम विश्वास करुइयन पूरा रुपम पापमसे अलौना सम्भव नैहो, तर, परमेश्वरक आत्मक सहायताले, हुँकर आपन मनह पापओर जाइ नैदेना सम्भावना भर बा। असिक, हुँकर परमेश्वरक उपस्थितिम आनन्दित ओ स्वतन्त्र जीवन जीठ (रोमी ६-८)।

पापम फँसैना (परिक्षा गर्नु)

पापम फँसैना कलक पाप कामओर मनह तन्ना काम हो, या पाप कर्ना इच्छा जग्ना हो। खास कैक ल्वाभ कर्लसे, ओ छारा जीवन जीलसे, पापम फँसना धेर सम्भावना रठा (याकूब १:१३-१५)। कबुकाल मनै हमार मज्जा लिहबेर, पाइन छामबेर, हमन पापम फँसाइ सेकठ (एफिसी ४:२६)। कबुकाल शैतान फे हमन पापम फँसैना कोसिस कर्ठा (मर्कूस १:१३ १ पत्रुस ५:८-९)। पापम नैफँसक लाग, हम्र परमेश्वरसे पुकारा करपर्ठा ओ आपन बानीव्यवहारम, सौँचविचारम, बोलिचालिम परमेश्वरक वचन अनुसार सुधार करपर्ठा (भजनसंग्रह ११९:९, ११, २८-३३)।

पापी मन घुमाक परमेश्वरकठे अइना (पश्चात्ताप)

“मै पापी हुइहुँ, परमेश्वरसे म्वार बिग्रल्सम्बन्ध ठीक बनाइपर्ना बा” कैक सौँच्ना, ओ “पाप घिनलगिटिक गल्ती बात हो, ओ मै आपन जीवनम पाप नैचहुँ” कैक निर्णय कर्ना काम, पापी मन घुमाक परमेश्वरकठे अइना हो (मर्कूस १:४-५)। पापी मन घुमाक परमेश्वरकठे आइल मनैन्हक

सौँचविचार, कामकाज, रहनसहन, सक्कु क्षेत्रम, परिवर्तन हुइलरठन (प्रेरित २६:१९-२०)।

ख्रीष्टीयन जीवनम आपन पापी मन घुमाक परमेश्वरकठे अइना सबसे पैल्हक कदम हो। पापी मन घुमाक परमेश्वरकठे अइना शक्ति परमेश्वर देठ। पापी मन घुमाक परमेश्वरकठे नैआइट्सम, पापमसे छुटकारा पैना सम्भव नैहो (हितोपदेश २८:१३; मत्ती ५:३-४; मर्कूस १:४, १५; प्रेरित २:३७-३८; २०:२१; २ कोरन्थी ७:१०; २ पत्रुस ३:९)।

मण्डली

मण्डली कलक ख्रीष्टीयनहुँकन्हक भेला हो। उ भेलम हुँक परमेश्वरक प्रशंसा ओ आराधना कठ, संगती कठ, एक औरजहन उत्साह देठ, ओ परमेश्वरक वचन सुन्ठ आदि (प्रेरित २:४२-४७)। असिक हुँक विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्र बुझपर्ना महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

मुक्ति

मुक्ति कलक खतरामसे बँचाजैना ओ सुरक्षित ठाउँम स्वतन्त्र रुपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना, (यूहन्ना ३:१६; रोमी ६:२३), ओ लौव जीवन पैना हो। हम्र पापक बन्धन ओ परमेश्वरक दण्डसे छुटकारा पाइल यी लौव जीवन जीए सेकठी (रोमी ६:१-१३; ८:१, ३२-३४; कलस्सी

१:२२), ओ परमेश्वरक चाहल अनुसार यी जीवन जीएक लाग शक्ति फे पैठी। (रोमी ८; एफिसी ५:१८; कलस्सी १:९-१२)। बाइबलक हिसाबले मनैन पापमसे बँचाइ सेकना व्यक्ति येशू ख्रीष्टकम विश्वास कैक केल मुक्ति पाजैठा। (प्रेरित ४:१२; १ तिमोथी २:५)।

मुवलमसे फेदोस्र जीना (पुनरुत्थान)

येशू कूसम मुल त, मनै उहाँक शरीरह एकठो बरानक पत्थ्रा खोल्क बनाइल गन्यम ढर्ल (मर्कूस १५:४३-४६)। पाछ, येशू फेदोस्र जीगैल। यी चाहिँ और जुनी लेक अइना काम नैहो (अर्थात् च्वालाला फेर्ना काम फे नैहो), भेष बदलना काम फे नैहो। तर मुनासे आघ येशूक उमेर, रुप, रङ्ग जसिन रलहन, मुवलमसे फेदोस्र जील त, उह उमेरम, उह रुप, रङ्गम उह येशू जीटी बाट कना बात हो।

संसारक पूरा इतिहासम सबसे महत्वपूर्ण घटना येशू ख्रीष्ट मुवलमसे फेदोस्र जीयल घटना हो (मर्कूस १६:१-८)। इतिहासक अन्त्यम सब मनै मुवलमसे फेदोस्र जीजउइयाबाट - येशूकम विश्वास कर्ना मनै सबजन स्वर्ग जउइयाबाट, विश्वास निकरुइयन भर नरकम जउइयाबाट। स्वर्ग जउइयन्हक शरीरम, भूतपन्यात लाग नैसेकट, च्वागबिच्वाग नैलागट, पाप नैरहट, ओ कुइ फे मुवाइ नैस्याकट (१ कोरिन्थी १५:५१-५७)।

यरूशलेम

इतिहास ओ संस्कृतिक धनी मानजैना यरूशलेम धेर पुरान एकठो ऐतिहासिक शहर हो। येशूक समयम यी शहर यहूदीया क्षेत्रम रह। यहूदीन्हक हिसाबले, यी सबसे महत्वपूर्ण शहर रह काजेकलसे यहूदी धर्मक केन्द्र मानजैना परमेश्वरक मन्दिर यह शहरम अवस्थित रह। सालो मुक्ति-दिवस मनाइक लाग यहूदीहुँकन, सक्यासम, यरूशलेमम जाइपरन। वर्तमान समयम, यी शहरह जेरूशलेम कठ, ओ यी इजराएल देशम पर्ठा।

यहूदी (हिब्रू / इस्राएली)

यहूदी, हिब्रू, या इस्राएली एकक जतिक मनैन जनैना नाउँ हो। पुरान नियमम सबसे पैल्ह हिब्रू अब्राहाम रलह (उत्पत्ती १४:१३), ओ हुँकाहार सन्तान फे हिब्रू हुइल। हुँकन्हक बोल्ना भाषह फे हिब्रू कैजाए, ओ येशूक समयम फे हुँक उह भाषा व्वालँट (यूहन्ना १९:२१; प्रेरित २२:२)। आम्हीसम उ भाषा बोलजैठा।

अब्राहामक नट्या याकूब रलह (उत्पत्ती २५:१९-२४)। याकूबक नाउँ पाछ जाक इस्राएल हुइलन (उत्पत्ती ३२:२९)। इस्राएलक बार भाइ छावन रलहन (उत्पत्ती ३५:२२-२६)। उह बार भाइ छावन्हक सन्तान बार कुल हुइल, ओ हुँक एकमुष्ठ रुपम इस्राएली कैक चिन्हगैल। पाछ जाक हुँक यहूदी कैक फे चिन्हगैल।

वास्तवम “यहूदी” शब्द यहूदामसे आइल हो। याकूबक बार भाइ छावनमध्येम एकठो छावक नाउँ यहूदा रलहन। यहूदक

बसोबास करल क्षेत्रक नाउँ फे यहूदा हुइल। तर उ ठाउँ बार कुल रहल देशक एक भाग केल रह। पाछ हुँक उत्तरी राज्य ओ दक्षिणी राज्य कैक दुई भाग हुइल (हेरी १ राजा १२ अध्यायसे पाछओर)। उत्तरी राज्यह इस्राएल कैगिल्, दक्षिणी राज्यह यहूदा कैगिल्।

पाछ जाक अशशूर देश उत्तरी राज्यह हमला कैक लैगिलन। तबदोस्र उ उत्तरी राज्यक सब इस्राएलीहुँकन अशशूर देशम लैगिल, ओ आपन मनैन उत्तरी राज्यम बसोबास कर लगैल। उ ब्याला दक्षिणी राज्य केल बाँचल, ओ यहूदा देशक मनैन 'यहूदी' कहलगलन। यहूदा राज्यह, धेर पाछ, ग्रीकहुँकन्हक ओ रोमीहुँकन्हक समयम, यहूदीया कैगिल्। हुँकन्हक धर्मह यहूदी धर्म कहँट। उ ब्याला "इस्राएलक सन्तानन्" एकमुष्ठ बुझाइक लाग, कबुकाल "इस्राएली" कहँट, ओ कबुकाल "यहूदी" कहँट।

आजकाल फे इजराएल देशम, ओ संसारक धेर मुलुकम, यहूदीहुँक पलबाट। हुँक आम्हीसम फे पुरान नियमक धेर बात, ओ हुँकन्हक आपन परम्परा, मन्टीरठ।

याकूब

लौव नियमम, चार जन मनैन्हक नाउँ याकूब बाटन। हुँकन्हक बारेम पाठकहुँक सचेत हुइपर्ठा:

अब्राहामक नट्या:

अब्राहामक नट्या याकूब रलह (उत्पत्ती २५:१९-२४)।
याकूबक नाउँ पाछ जाक इस्राएल हुइलन (उत्पत्ती ३२:२९)।
इस्राएलक बार भाइ छावन रलहन (उत्पत्ती ३५:२२-२६)।

उह बार भाइ छावन्हक सन्तान बार जाति हुइल, ओ हुँक्र एकमुष्ठ रुपम इस्राएली कैक चिन्हगैल। पाछ जाक हुँक्र यहूदी कैक फे चिन्हगैल।

येशूक दुइ जन चेलन्हक नाउँ:

जब्दियक दुइ भाइ छावन येशूक चेलावँ रलह। हुँकन्हक नाउँ याकूब ओ यूहन्ना रलहन (मत्ती १०:२)। येशूक चेला हुइलकम उ याकूब धेर दुख पैल, ओ राजा हेरोद अग्रिपक शासनकालम तरवारले कट्वापैल (प्रेरित १२:१-२)। येशूक और चेलक नाउँ फे याकूब रलहना उ अल्फायसक छावा रलह (मत्ती १०:३)। मनै कबुकाल उ याकूबह छोट्की याकूब फे कहँट।

येशूक भैया:

योसेफसे भ्वाज हुइना कैक मरियमक ठोकौनी खारखलहीन। हुँक्र दुनु जन राजा दाउदक शहर यहूदीया क्षेत्रक बेतलेहेमम नाउँ लिखाए गैल्समयम मरियम पैल्हा छावा येशूह जर्मैली (लूका २:३-७)। पाछ हुँकन्हक और लर्कापर्का (याकूब, योसेस, सिमोन, यहूदा औ छाईहुँक्र) फे जर्मलन (मत्ती १३:५५-५६)। पाछ उह याकूब यरूशलेम मण्डलीक अगुवा हुइल ओ संसारभर फैलल्यहूदी ख्रीष्टीयनहुँकन लिखल। थप जानकारीक लाग “याकूबक लिखल चिठीक परिचय” हेरी।

येशू ख्रीष्ट

हुइना त येशूक अस्तित्व सड्डभर पलबाटन, तर फे उहाँ लगभग २००० वर्ष आघ इस्राएल देशम मनैया होक

जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइट। उहाँ एकठो मनैया केल नैरलह, तर परमेश्वर फे रलह। उहओसे उहाँकम परमेश्वरक गुण रलहना। उहाँ मनैया होक जर्मल त, उहाँकम रहल परमेश्वरक गुण नैहेरैलन (यूहन्ना १:१-२; कलस्सी १:१५-२०; हिब्रू १)। असिक उहाँ परमेश्वर त पलरलह, ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहना। उहाँ धेर फ्यारा पापम फँसना अवस्थम पर्ल, तर पापम कबु फे नैफँसल (हिब्रू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल, ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे मुक्ति दिहक लाग, परमेश्वरक योजना अनुसार उहाँ क्रूसम मुल। उहाँक मुवल शरीरह मनै एकठो गन्यम ढर्ल। वाकर तीसर दिन, उहाँ मुवलमसे फेदोस्र जीगैल (मर्कूस १५-१६)। फेदोस्र जीलक चालीसवाँ दिनम, धेर मनै देख्ती-देख्ती, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाञ्जर बैठल बाट (हिब्रू १:३; १०:१२)।

येशू एक दिन आपन राज्य स्थापना कर फेदोस्र अउइयाबाट। तबदोस्र येशू ख्रीष्टकम विश्वास करल मनै

स्वर्गम सङ्गभर परमेश्वरकसँग रहपैहीं, तर उहाँकम विश्वास नैकरल मनै नरकम जैहीं (मत्ती २४-२५)।

विश्वास

सामान्य रुपम विश्वास कर्ना कलक केक्रोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्म परमेश्वरह ओ हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख नैसेकटी। तर हम्म बाइबलम परमेश्वरक कहल बात विश्वास कठीं, जसिन कि, उहाँ मैया कर्नाहा बाट (१ यूहन्ना ४:८-१०), उहाँ हमार वास्ता कठ (१ पत्रुस ५:७), ओ आत्मिक जीवन जीएक लाग, आवश्यक पर्ना सब चिज उहाँ हमन देरखल (२ पत्रुस १:३-४)। हुइना त, रुखाबरेखा या चिरैँचुरुङ्गन या हमार आसपासम रहल भौतिक वस्तु द्याखअस असिन बात हम्म आँखिले निदेख्ठी, तर फे हम्म असिन बात सत्य हो कैक विश्वास कठीं ओ उह अनुसार जीठी।

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुगठी। उ सङ्गवा बल्या बा कैक विचार कठीं, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्म विश्वास निकर्टीं। तर, यदि उ सङ्गवमसे उपार जैठी कलसे, उ सङ्गवम भर पर्लीं कना बात थाहाँ हुइठा। यी बात सङ्गवम विश्वास करल बात हो।

ओसहँक, परमेश्वर परम उपकारी बाट (भजनसंग्रह १४५:८-९; मर्कूस १०:१८), उहाँ हमन मुक्ति देठ (एफिसी २:८-९), ओ उहाँ हर समयम हमार भलो हुइना काम कर्टीबाट कना बात हम्र विश्वास करपठा (रोमी ८:२८)।

व्यवस्था

साधारण हिसाबले थारु समाजम व्यवस्था कलक राजनैतिक व्यवस्था बुझैठा। तर पुरान नियमम, व्यवस्था कलक जीवनक सक्कु पक्षह समेट्ठा: मजा ओ नैमजा व्यवहार, धार्मिक क्रियाकलाप, ओ सामाजिक जीवन (राजनीति समेत)। इस्राएलीन्हक शासक परमेश्वर हुइलकओसे, व्यवस्था कलक परमेश्वरक इच्छा, आज्ञा, ओ नियम हो। व्यवस्था भङ्ग कर्ना कलक परमेश्वरक आज्ञा नैमन्ना हो, या नियम उल्लङ्घन कर्ना हो, या पाप कर्ना हो। उहओसे इस्राएलीहुँक सब काम व्यवस्था अनुसार करँट्। सब काम कलक पारिवारिक ओ सामाजिक क्रियाकलाप (जस्त: भ्वाजकाज, मर्नीकर्नी, स्वास्थ्य ओ सरसफाइ), धार्मिक क्रियाकलाप (जस्त: परमेश्वरक आराधना, ओ टैटिहार) आदि पठा।

शुरुम, परमेश्वर मोशह दश मुख्य आज्ञा देलह (प्रस्थान २०:१-१७)। पाछ, यी आज्ञह मोशा बिस्तारित रुपम बाइबलक पैल्ह पाँचठो किताबम लिखल (उत्पत्ती, प्रस्थान, लेवी, गन्ती, ओ व्यवस्था)। बाइबल पुरान नियम ओ लौव नियम कैक दुई भागम लिखल बा। पुरान नियमम, यी

पाँचठो किताब समेत, जम्माजम्मी उनन्वालीसठो किताब बा। पुरान नियमक और किताब परमेश्वरक वचन बोलुइयन, राजाहुँक, ओ और मनै लिखलह। यी सक्कु मनै यहूदी रलह। कबुकाल पूरा पुरान नियमह व्यवस्था कैजिठा (यूहन्ना १०:३४; १२:३४; १५:२५)। कबुकाल जुन पुरान नियमक पैल्ह पाँचठो किताबह केल व्यवस्था कैजिठा (लूका २४:४४)।

परमेश्वर "इस्त्राएलीहुँकन दिहस्" कैक मोशह दश आज्ञा ओ बाइबलक पैल्ह पाँचठो किताबम रहल और व्यवस्था दिहलओसें, मोशक लिखल यी पाँचठो किताबह कबुकाल मोशक व्यवस्था फे कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)।

ख्रीष्टीयनहुँक बुझपर्ना महत्वपूर्ण बात का हो कलसे, पुरान नियमक धेर जसिन व्यवस्था, जसिन खाना ओ स्वास्थ्यसे सम्बन्धित व्यवस्था, ओ निश्चित धार्मिक व्यवस्था, हमार लाग येशूक आनल मुक्तिक कारणले प्रभावकारी निहो (गलाती ३:२३-२९; हिब्रू ९:१-१०:१८)। तर येशू व्यवस्था भङ्ग कर अइलक निहुइट, उहाँ त व्यवस्था पूरा कर अइलक हुइट (मत्ती ५:१७-२०)।

शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ फे आत्मा रलकओसें, ओही द्याख नैसेक्जाइट। वाकर मुख्य काम कलक परमेश्वरक विरोध

कर्ना हुइस, तर शैतान मनपर्दी कुछु फे कर नैपाइट्(अय्यूब १)। शैतान परमेश्वरक विरोध केल नैकरट, तर मनैन दुःख देना काम फे कर्ठा। उ मनैन्हकम पापी मन जगादेठा, उहओसें मनै औरजहन ठग्ना, ढँग्ना, लुट्ना, ओ मुवैना काम कर्ठा असिक मनै पापम फँसठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट् (२ कोरिन्थी ४:४)। उ परमेश्वरक करल सृष्टि ओ योजना भताभुङ्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।


हम्र परमेश्वरक शक्तिले केल शैतानह हराइसेकठी। यदि हम्र शैतानक विरोध कर्बी कलसे, उ हमारठेसे भग्नेबा (याकूब ४:७)। कूसम टङ्गागिल येशू शैतानह हारारखल (हिब्रू २:१४-१५)। उह फे संसारम वाकर शक्ति आम्हीसम पलबाटस। तर अन्तम, शैतानह सह निसेकजैना दुःख भ्वाग परहिँस, काकरकि उ आगीक भट्ठीम फाँकजैनेबा (प्रकाश २०:७-१०)।

स्वर्ग

स्वर्ग परमेश्वरक घर हो। स्वर्गक खबर पुगुइयन उहँ परमेश्वरक आराधना कर्टीरठ। येशूकम विश्वास करुइयन मुलसे, स्वर्गम सङ्डभर परमेश्वरकसँग रहुइयाबाट। मुक्ति पैना कलक स्वर्ग जैना हो (२ कोरिन्थी ४:१६-१८; १ पत्रुस १:४)। स्वर्ग कलक दुःखकष्ट, रोगबेराम, झग्राझाँटी, या

चिन्ताफिक्री नैहुइना ठाउँ हो, तर खुशी, आनन्द, सुखचैन,
रमाहटम रहपैना ठाउँ हो (२ तिमोथी ४:१८; १ पत्रुस
५:१०; प्रकाश २१:१-४)।

नेपालसे इस्राएल कहाँ पठान कैंक देखाइल नक्सा



इस्राएलक नक्सा

